

أسياد وعبيد

ليلة في حضن الجبل

سمير حمايه

الجزء الثاني

كلمة

نعلم دائما نقطة البداية ولا نبصر الطريق لخط النهاية ولذلك نتعث دائما في خطواتنا،نبحث عن الحلم في الحجرات المغلقة دون أن نحاول فتح الباب..

١ - امام قصر جعفر

دائماً نُحلم بأن ينطق من حولنا بالحق دون الحاجة إلى جدال وجهد
لإقناعهم به حتى تستقيم الحياة فالضمير الذي لا يمنع المرء إرتكاب
الخطأ هو نفس الضمير الذي يتنبه للحق ولكن نغفر له إرتكاب الخطأ
ونتمادى فيه وننسى تنبيهه للحق ، نسير بالضمير كيفما نشاء حسب
الأهواء، ننظر للحياة ونحن نلبس هذا الحذاء الضيق ، نستخدم الماء
لإطفاء النار في الحريق ، ولكن في حياتنا الجدلية نطفئ النار بالنار.
....أعد جعفر العدة لتنفيذ حكم قاضي عسكر أفندي وتنفيذ القصاص
لولي الدم ، تجمع أهل القرية لرؤية حسن وجعفر واللزي وهارون
في سعادة غامرة حتى كريم جاء يتشفى في حسن ، كل أهل القرية
ينتظرون ما يحدث إلا لوحظ فهي تعلم أن حسن قد هرب وهي من
ساعدته على الهرب ، جعفر يأمر اللزي ورجاله بإحضار حسن من محبسه
لتنفيذ الحكم .

..هرو لالزي وخلفه طلب وبكر وصعدوا السلم ولواظ في حجرتها
تستمع لوقع خطواتهم وتنتظر المفاجأة التي أعدها القدر لهروب حسن
...عبدالمولي الحارس الكلف بحراسة الحجرة استقبل الرجال
ببشاشة .

...كل شئ تمام ياسبع .

... افتح وطلعوه أنت والرجال .

....ماشي ياسبع.

فتح عبدالمولي مزلاج الباب الخشبي الكبير ودخل وخلفه طلب
وبكر وكانت المفاجأة عدم وجود حسن .

عبدالمولى يصرخ ويندب .

... راح فين انا ماسيتش المكان.

دخل اللزي الحجرة عندما إستبطأهم .

... فيه أيه ..؟ وهو فين ؟

طلب

مفيش حد هنا ، الظاهرهرب.

عبدالمولى

...والنعمة الشريفة انا ماتركت مكاني هنا

اللزي انهال بالضرب على عبدالمولى بجنون وعبدالمولى

يُقسم أنه لم يبرح المكان .

٢- أمام قصر جعفر

وصل لمكان تنفيذ الحكم منقريوس ورحان ومرسال ومسعده
ومعهم يشعة ومريم ، هم في حالة حزن غير عادية ومسعدة
ويشعة ومريم في حالة بكاء ويدعون على الظلمة، جعفر
وهارون وكريم ينظرون لهم في تشفي وسخرية ووصولهم
لمكان تنفيذ الحكم أسعد جعفر ورجاله ، مر الكثير من الوقت
و أهل القرية في حالة ترقب غير عادية وحزن والشيخ آدم
بصحة ابنه شحاته ، حيث ينقل له شحاته كل مايدور حولهم
الحمداي وابنه حمدان وابن اخيه سديري ومحمد عوض
يقفون في مقدمة الصفوف وهم في حالة حزن .
... يظهر اللزي وهو ممسكاً بعبدالمولى وينهال عليه ضرباً
وتلطيشاً وعبدالمولى يُقسم انه لم يتزحزح من مكانه، لم يظهر
حسن معهم وتحول أهل القرية من حالة حزن إلى فضول
ودهشه ، لا يفهمون ما يحدث حولهم.
...جعفر محدثاً اللزي .
.. فيه أيه ..؟ وفيه حسن؟
.... مش موجود في أوضة الحبس.
جعفر في دهشة وغضب
.. ازاي بتقول أيه ؟
... الظاهر هرب .
...هرب!! ازاي ..؟ ومن قصري أنا !
...هو مش موجود.

...أدرك أهل القرية أن حسن قد هرب مما يروه من غضب على

وجه جعفر ورجاله .

.. اللزي يقترب من منقريوس.

... انت هربت حسن .

... هو حسن هرب الحمد للرب.

اللزي

فرحان ويصفعه بقوة ويشعه تحتضن أبيها قبل أن يقع على

الأرض.

.. ربنا يشل ذراعك يابعيد.

احنا مانعرفش حاجة عن حسن

من وقت ما انتوا اخدتوه

وحنقدروا نهريوه ازاي ولو كنا نقدر

ياريت وكنا مش حنخاف ،

احنا ياابو قلب قاسي جينا علشان

نودع حسن الي ظلمتوه.

ولكن ربنا أكبر منك ومن جعفر

ومن قاضي عسكر بتاعكم.

... اللزي في حالة جنون يصرخ في أهل القرية ليفرقهم

وأهل القرية ينصرفون وهم في حالة فرح بنجاة حسن.

٣- المغارة

ليتنا ننظر لشق حبة القمح لنأخذ منها العظة ، لنُدرك أن الله وضعها
في نصفين لنتقاسمهما ، ليتنا ننظر للأشياء نظرة المنصف هي لك
ولأخيك ولم يخلقها الله لك وحدك ، يالنا من أغبياء نتقاتل على جمع
المال ونذهب للقبر بدونه ونُحاسب عليه كله ، نعيش في الحياة
كمقبض باب يديرونه كيفما شاءوا.

بدأ حسن يستفيق من غيبوبته ، نظر حوله ونظر نحو السلوقي

....أنا فين ..؟ وحصل أيه ..؟

... لقيتك واقع ورا دار جعفر

وقولتلي وديني أي مكان في الجبل.

...ايوه فاكر اني قلت كده ،

ولكن مش فاكر حاجة بعدها .

.. انت بعدها مانطقتش .

.. جيتني هنا ازاى ؟

...حطيتك على شوال وجبتك.

انا بحبك يا حسن.

...انت تعرفني ؟

.. ايوه شوفتك لما ضربت كريم

وخلصت تاري ، كان لسه ضاربني

وشوفتك ومهران عاوز يموتك وانت غزيتيه وانا

فرحت كان برضوا لسه ضاربني

قبل ما يدخل الجامع.

حسن يبتسم .

.. واسمك ايه .

.. انا سلوتي وده بيتي وماتخفش ، مافيش حد يعرف بيت

الكفار ده غيري.

... اسمه بيت الكفار.

... اه هما بس الي سكنوه قبلي.

...ربنا يجازيك خير ، لولاك كان زماي ميت، أو كانوا قبضوا

عليه تاني.

.. أنت صاحبي وانا بحبك وفرحان إني شوفتك.

حسن محاولاً الجلوس والسلوتي يعترضه.

.. لا بلاش تتحرك ، لما تخف.

..طيب اسندني اقعد شويه.

ساعد السلوتي حسن حتي اعتدل قليلاً في جلسته، يتذكر

هذا الصوت الذي ساعده ، هو صوت امرأة ولكن من

تكون وكيف وصلت إليه ، هو لم يتبين ملامحها في الظلام

فقط سمع صوتها،التفت للسلوتي.

... انت تعرف بيت جعفر ياسلوتي ؟

.. ايوه بروح هناك كتير،

لواظ حلوه، بتديني رمان وجوافه

وتفاح وهدوم ،حتى اللمبه الي بشوف بيها هنا

منها هي.

... مين لواظ دي ؟

... دي بنت جعفر ، معندوش ولاد غيرها وهي طيبه زي

امها اللي ماتت من زمان .

تأكد حسن أن من ساعدته في تهريبه هي لواظ. التفت للسلوتي

.. عاوزك توصل بيت المقدس وتطمئنهم عليه.

.. خلاص اطمنوا عليك وعرفوا انك هربت .

.. يعني عرفوا اني هربت .

..ايوه وأهل البلد كلهم عرفوا وفرحوا بيك.

... تقدر تجييلي اهلي اللي قاعدين عند المقدس.

... ايوه ، بس شويه ، جعفر واللي بيديروا عليك

٤- داخل دكان علي معبد

الجهل هوموت والمعرفة حياة، فالأمة الجاهلة تسقط والأمة التي
تبني حضارتها على المعرفة تتقدم وتسبق الأمم وكلما زادت
المعرفة لدي أمة ، كان نصيبها من النجاح أوفر، يجب أن نحلم
ونحلم ونظل نحلم طالما هناك نفس في الحياة ، يجب أن لا تشكلنا
الأحداث ونبكي معها تارة ونحزن معها تارة، علينا أن نمضي
قُدماً وأن لا نتعلق بالأشياء التي يوجعنا فقدانها ،علينا أن ندرك
أن ما يضيع منا بالأمس صعب إرجاعه وأن كل غالي ونفيس
سهل فقداؤه.

يجلس داخل دكان علي معبد المعتاد من زبائنه ابوسديرة

وحمدان والفخراي وعبدالمجتلي .

الفخراي

.. الشاي النهارده على حسابك يا ابوسديرة.

...ماهو كل يوم على حسابي ، انت بتدفع حاجة.

... لا بس النهارده شاي مش زي اي شاي.

شاي العريس.. خلاص فاضل على العيد

وتبقى عريس.

حمدان وهو ينظر مبتسماً لسديري

.. الفخراي حيشغل عليك يا عريس وحيفضل يشرب

شاي على حسابك لحد مايخلص الفرع.

عبدالمجتلي الأخنف

.. لا وحياتك وبعد الفرح حيخليه عريس لحد مايزهقه.

حمدان

...مفيش أخبار عن حسن .

الفخراي

... من وقت ماهرپ ولا حد سمع عنه حاجه،

يمكن جعفر واللزي نسيوه كمان ..

سديري

ياخساره ، كان نفسي يعيش وسطينا.

عبدالمتجلي

مكانوش حيسيويه ولا يسيبونا في حالنا .

٥- في المدافن

العيد في الصعيد في هذا الوقت له طقوس وأشكال خاصة بأهل الصعيد ويختلف عن مصر المحروسة في كل مظاهره، ويتفقوا معهم في شئ واحد فقط ، هو إرتداء الملابس الجديدة في صباح يوم العيد وسعد الخياط لا يتوقف عن تفصيل الملابس لأهل القرية قبل العيد بشهر ، فموسم عمله الأكبر في العيدين، ولكن باقي الأيام نادراً مايطرق بابه أحد، بعد صلاة الفجر ومع بداية شروق الشمس، يصلي أهل البلدة صلاة العيد بملابسهم الجديدة وبعد الصلاة، يبدأ إحتفالهم بالذهاب للمدافن ليحتفلوا بالعيد هناك مع الأموات حاملين معهم المخبوزات والبلح كصدقات يهبونها للناس هناك رحمة ونور على روح الميت ، لاتجد أجداً في القرية فجميع أهل القرية من رجال ونساء وشباب وأطفال يتجهون للمدافن .. في المدافن زحمة غيرعادية على القبور ، يُحيط بالقبور بعض أشكال الإحتفالات من مراجيح خشبية للأطفال ولعب متنوعة مصنوعة من الخشب وكان أشهرها للأطفال لعبة الفران ، لعبة خشبية بسيطة بمروحه صغيرة تعمل عند شد الخيط، أيضا ينتشر في أطراف القبور بائعي الحلوى والطعمية و أشهر مايباع في العيد وعليه إقبال غير عادي هو الملوحة ، عبارة عن سردين صغير مملح ومضاف عليه ألوان حمراء، تجد بائعي الملوحة يضعون الملوحة في صفائح ويعرضونها للناس ويرغبونهم في شراءها، يتبادل أهل القرية التهنئة على القبور والشيخ آدم يتنقل بإبنه شحاته من قبر لقبر حسب رغبة من يريد ويقرأ على كل قبر القليل

من آيات القرآن ومن يقرأ على قبره يمنحه أقارب الميت
بعض الخبز والفأيش والكعك بالسكر وهم ماهرون في صناعته
والكعك لديهم كبير الحجم ليس مثل كعك المحروسه والدلتا
ويستخدمون في صناعة الكعك والفأيش كمية كبيرة من السمن البلدي
واللبن ، لذلك مذاقه جيد وأفضل وإن كان يعيبه أنه ليس
مثل كعك المدين يمكن بقاءه فترة كبيرة ولكن كعكهم ينشف
سريعاً خلال أيام قليلة .
إستغل السلوتي خروج أهل البلدة للمدافن بمافيهم جعفر واللزي
وهارون ورجالهم ، قام بتهريب رحان ومرسال ومسعدة إلى
الجبل ، حيث المغارة التي يتواجد بها حسن .

٦- أمام دار الحمداني

في الكثير من الوقت لا نحتاج للسؤال لمعرفتنا للإجابة لكن قد
نتغاي ونسأل بحثاً عن إجابات متوقعة، سوف نظل نبحث عن الحلم
ونغزل منه ثوباً للحنين، ويملأ القلب وجع الإنتظار ويتناسى وجع
السنين .. سوف نظل نصرخ ، ننادي ، عسى أن نجد يوماً مجيب .
أمام دار الحمداني ، تجمعن فتيات القرية للغناء والرقص إحتفالاً
بقرب زواج ليلة ، هم إعتادوا على تلك العادات قبل أفراح الزواج
النسوة والفتيات يُغنين في سعادة أغاني شعبية همذاق خاص.

، إحدى فتيات القرية تغني.

... لوماه على لوماه .. على لوميه

.... خايفه لقول حبيت ... يلوموا عليه

بعض الفتيات يرددن خلفها وهن يصفقن ويرقصن

....بتضربني ليه وأنا اسمي أسما

... وتسمع الجيران...الي مالوش لازمه

... يارايحين السوق.. قولوا لحمايه

.... بنتك ورا الجمال .. ماشيه تغني

.... لابسه فستان أحمر....بتاع صبحيه

... لوماه على لوماه .. على لوميه

.... خايفه لقول حبيت ... يلوموا عليه

... بتسألني ليه عن إسمي .. وانا سكينه

وتفرح الجيران ..فينا

..أه يارايحين السوق ..قولوا لحمايه
.... بنتك ورا الجمال .. ماشيه تغني
.... لابسه فستان أبيضبتاع صبحيه
... لوماه على لوماه .. على لوميه
.... خايفه لقول حبيت ... يلوموا عليه
. اللزي وهريدي يسمعان صوت الغناء .
....مين اللي بيطبل ده ياواد يهارون
...هو فيه غيره ؟..
... قصدك تقول إن الطبل والغنا ده.
جاي من عند دار الحمداني.
.... ايوه بيقولوا فرح ليله على سديري قرب.
تاني يوم العيد.
اللزي يضحك بصوت عالي .
... طالما بتضحك ياسبع الرياينه يبقى مش حتسكت.
.. بعدين حتعرف كل حاجه .
يأتي كُريم مسرعاً.
... سمعت يالزي اللي حصل.
... خير يابو وش حلو؟
....باقي الناس اللي كانوا مع حسن هربوا من البلد.
.. هربوا ؟ هربوا ازاي ؟
.. الظاهر لما اتلهينا بالعيد هربوا.
هارون

... في ستين داهيه ، أنت مزعل ليه نفسك يالزي.

،تلاقيهم خافوا ، وقالوا نحصل حسن

...ياريت يكون الي بتقوله صح.

،انا مش مرتاح .بيننا على جعفر

نقوله على هربهم

٧- قصر جعفر

داخل دفاتر الذاكرة الكثير من الأمانى والأحلام....نظن أننا إقتربنا منها وفجأه نكتشف أنها ذهبت أدراج الرياح وتم دفنها في مقابر المستحيل ولا نملك إلا أن نزرع أشجار الصبار حولها.

في حجرة الجلوس ، تجلس لوحظ وحليمه ولواظ

في حالة يأس وكآبه.

... أنا زهقت من السجن ده يا حليمه.

... ماتفتريش على النعمه اللي أنت فيها

ياست لوحظ، تعالي شوفي حياتنا .

كلها غلب وفقر وخوف وشقا.

... حياتك دي أنا بحسدك عليها.

... على أيه يحسره، مين فينا

يحسد الثاني .

.. خلاص فرح ليله قرب.

.. ايوه ياستي تاني ليله بعد العيد.

... يابختها حتتجوز اللي بتحبه ويحبها

... ربنا يستر من اللزي ،

.. ماله اللزي .

... مش حيعديها على خير دلوقت حيفضي

نفسه لسديري ، بعد مامشي حسن.

... مفيش أخبار عن حسن يا حليمه.

... لا مفيش أخبار، حتى قرايبه اللي كانوا عند

المقدس يقولوا مشيوا .

... كده يبقوا سابوا البلد خالص.

... تلاقيهم ماصدقوا يمشوا . اللي شافوه

. اللي شافوه هنا مش شوية .

قلب لواحظ ينقبض بقوه ، مشاعر عميقة تمكنت

منها ولكن ماذا يُفيد الحنين وشوق قاتل في إنتظار

صعب ، هي تحلم بحلم أقرب للمستحيل، تحلم

ببشرى لقاء ويمر أمامها نهار بعد نهار وليل بعد ليل

وبعد أن تفيق ، تتذكر أنه ليس هناك محطة إنتظار.

٨- أمام دار سديري

أهل البلد يحتفلون بسديري ، مجموعة من الدكك متراسة

في إنتظام يجلس عليها أهل البلد كلوبات إضاءة معلقة في كل مكان عبيد من القرية يقدمون الشربات، الشباب

يرقصون بالعصا ومعهم سديري ، عبدالمجتلى يتلقى

النقوطة من أهل البلد ومنهم من يُنقط بباره ومنهم

بإثنين وعبدالمجتلي ينطق اسم صاحب النقطة

ويقول .

... محمد عوض عقبال عنده.

. من عادة أفراح الزواج في الريف في هذا الوقت أن

يذهب حصان إلى أهل العروسة ، ينقلون به العروسة

إلى منزل العريس ، حمدان يركب الفرسة وخلفه

العروسة اخته ليله في فستان أبيض، بعض الشباب

يسير بموكب العروس بصحبة الحمداني والد العروس

قطعوا درب الحواشي وإنحرفوا بجوار القريوس

في الطريق لدرب بيت ابراهيم، حيث يوجد

منزل سديري ، عند منتصف القريوس وقبل

إنحرفهم للدرب ، قطع عليهم اللزي الطريق

بخمسة من رجاله .

اللزي محدثاً الحمداني .

.. على فين العزم ياحمداني.

... زي مانت شايف يالزي .

... مش قولتلك بلاش الجوازه

دي ياحمداني.
... سيينا في حالنا يالزي.
وخلي الليلة تفوت على خير
البت ومش رايداك ورايده ولد عمها.
يعتلي وجه اللزي الغضب.
....إسمع ياحمداني،البنت اللي تقول لا للزي
تعيش باقي عمرها بايره.
زي الخرابه ، خد بعضك وبنتك
وارجع ، بدل ماغضبي يزيد.
حمدان ينزل من الحصان ويتجه بالقرب من والده.
....الي في دماغك ، مش حيحصل يالزي ...
ومش حتتجوز ليله اختي .
ومحدث حيتجوزها غير سديري بن عمها.
يقترّب اللزي من حمدان والحمداني ساخراً.
....لا والله خلفت ياحمداني.
خلفت الي يقف قدام اللزي
ويقوله لا ومش البنّت بس، كمان الولد.
الحمداني يخشى على حمدان إبنه من تطاول اللزي.
محدثاً إبنه .
....انت مالکش دعوه بالكلام ده .
ولما ابوك يتكلم انت تسكت
(يلتفت للزي) ماتاخدش على كلامه

ده عيل .

... لا انا مش عيل ، ومش حتتجوز اختي يالزي .

اللزي ضاحكاً بسخرية .

....لا سيع ياواد ، أبوك عرف يخلف راجل.

يقترب اللزي من حمدان، فيعوقه الحمداني ، فيدفع

الحمداني بقوة فيقع على الأرض ، ينقض على

رقبة حمدان ويطرحه أرضاً واضعاً قدمه على

صدره .

السلوتي يتابع المشهد من بعيد ويجري

مسرعا لدار سديري ليبلغه بما حدث.الحمداني

يحاول الوقوف على قدميه.

... الواد مش حملك يالزي ، سيب الواد.

ليله تنزل من على الحصان وتتجه نحو اللزي

كاشفه وجهها.

....سيب اخويه يامفتري .

ياظالم ، انا بكرهك

تضرب اللزي على صدره وهي في حالة صراخ

وبكاء، يقترب منها الحمداني ويمسك بها مبتعداً

....تعال يابنتي ، المفتر فيه اللي أقوى منه.

أمسك هارون حمدان وشل حركته ، الحمداني

يرضخ للأمر.

.... سيب الولد حاخده هو واخته وخرج البيت

زي ماقلت يالزي .

.. أيوه كده ، إعقل ياحمداني .

حمدان يثور على اللزي معترضاً على كلام أبيه

... لا أنا مش حرجع البيت وحاخد اختي لبيت

جوزها، حتى ولو موتني اللزي .

اللزي يصفح حمدان بالقلم ويتجه نحو ليله.

....إرجعي مع ابوكي ع الدار ياحلوه.

يصل سديري منفعلاً.

....مالكش دعوة بيها يالزي .

اللزي ساخراً

..أهلاً بعريس الغبرة (ينظر نحو الحمداني)

....مش حرام الغراب ده ياخذ الظرظورة الحلوة دي.

سديري .

... بلاش غلط وسيني أخذ مرقي وامشي .

اللزي يضحك ساخراً

...تاخذ مرتك ..

ساخراً

اه بصحيح هي مرتك ...

منفعلاً

...انت حتطلقها دلوقتي .

... مش حطلقها يالزي ، وحاخدها لبيتي.

اللزي ينظر إلى حمدان

... اللهم ماطولك ياروح ، حتلموا الدور ولا مش

حيحصل كويس .

الحمداني وهو يمك بسديري .

..بيننا نرجع للدار وكفايه لحد كده ؟

اللزى

.. لا خليه يطلق دلوقتي .

سديري

... مش حطلق يالزى .

...يبقى حقتك وادفك دلوقت .

.. لو راجل حطب معايا عصا.

اللزى ساخراً ومستهيئاً به .

.. عاوز تحطب مع اللزى عصا .

يكرر الضحك

.. ماشي نلعب دلوقتي .

سديري

... لا مش دلوقتي ، بكره في العصريه وهنا

في نفس المكان .

اللزى

... ماشي ، علشان موتك يكون قدام البلد

كلها (محدثاً ليلة) روجي البيت اقلعي الابيض

ياعروسه وغيره ب اسود .

٩- دار ارمنيوس

في مدخل دار ارمنيوس ، يجلس على الدكة ممسكاً

بكوب شاي ، في الدكة المقابلة تجلس مريم ويشعه

يشعه

....شفت الي حصل يابا.

الذي رجع ليله ليبت أبوها

ومنعها تروح بيت جوزها.

... الذي ظالم وحشوف فيه يوم قريب

ببركات الرب.

مريم

...سمعت كمان إن سديري حيحطب

العصا معاه بكره في العصريه

ارمنيوس .

.. سديري غلط وحط نفسه قدام الريح.

٢٧

.. هو مش اد الذي.

مريم

.. ده ماكنش حينفع معاه غير حسن.

ارمنيوس

.. الذي قوي وجامد يابنتي غير كريم.

ولسه بدري على حسن علشان يقدر عليه

يشعه

... كويس إن كل أهل البلد فاهمين إن حسن

ترك البلد وهرب، ياترى عامل ايه دلوقت.

... الجرح بتاعه قرب يلم خالص، عاوز أعدي

عليه بكره اطمئن عليه

واوديلهم شوية زاد، مسعده ورحان

خلوا من المغارة ولا أحسن بيت.

ماتحسبش انك في مغاره .

يشعه

...بلاش تروح انت يابا ،المره اللي فاتت ربنا ستر

في رجعتك ، مانضمنش المره دي يحصل ايه..

أنا اللي حروح وقبل القياله .

حكون جيت من هناك .

... أخاف عليك ، ممكن حد يشوفك.

ويمشي وراك.

....ماتخفش يابا ، كلهم حينشغلوا بالتحطيب ..

وانا حروح من طريق الشيخه خضره من ورا ..

.. واعدي الكوله وادخل على الدرب.

... وانا حوصل الدير أقعد شوية هناك ،والعصريه

حاجي وانت خلي بالك من نفسك.

ينتهي ارمنيوس من شرب الشاي ، يتاول الكوب

لمريم ويخرج.

مريم

.. ابقى خلي بالك على نفسك يايشعه.

... ماتخافيش على اختك ، اختك همية راجل.

..عاوزه اقولك حاجه كمان.

... قولي يا اختي.

... اوعي تكوني بتحبي حسن يايشعه.

... مش حعرف اجاوبك بالظبط، لكن انا

باستريح لحسن، يمكن بتعاطف معاه

احنا مالناش اخوة صبيان ، بشوف حسن

اخويه.

١٠- حجرة لواحظ

كالعادة تجلس هي ورفيقتها حلیمه .

...تصدقني صعبة عليه ليله، الظاهر اني...

حسدتها... امبارح كنت بقول يا بختك يا ليله.

....اسكتي ياستي ، حالها لا يسر عدو ولا..

حبيب ومش مبطله عياط.

.. انت رحتي زورتها .

... ايوه ، الدار كلها بعد ما كانت في فرح..

قلبت محزنه والي تعبهم اكر طلب سديري...

يحطب مع اللزي بالعصا، رمي نفسه في المر.

....سديري بيدافع عن قلبه يا حلیمه، سديري

مغلطش ومكنش قدامه طريق ثاني.العشق

نار لو ولعت في القلب ما ينطفش يا حلیمه.

...يغور العشق الي يموت صاحبه، ما يريح..

دماغه وبناقص من ليله .

.....لو ريح دماغه ، حيرح قلبه ازاى، حيعيش

ميت ويفضل طول عمره ميت.

... كلامك حلو يا ست لواحظ، أنت جيتيه منين ؟

....مش كل الحاجات بتتعرف يا حلیمه، فيه حاجات

بتتحس وما يحسش بيها غير صاحبها ، ربنا يكون

في عون ليله وسديري .

.... ويكون في عون اللزي كمان ، ماهو على

كلامك هو كمان بيعشق ليله.

...العشق حب وعطاء وتضحيه مافيهوش

غل وحقد وهو زي القفه ياحليمه ام ودنين

ولازم يشيلها اتنين ، اللزي عاوز ليله تحبه

بالعافيه وبيفرض قوته على قلبها، اللزي

حبه حب تملك بس، هو بيحب نفسه اكر

وعاوز يملك ليله زي اي حاجه عاوز يملكها.

١١- داخل دار الحمداني

تمر الأيام ويجري العمر، وصوت السكوت حزين، نبحث عن الحب والشجن ونشتاق للأنين، نبحث عن حب في زمن توقف قلبه عن النبض، نتمني الحب في زمن ضل منه الحب.

يجلس سديري مع ليله التي انهمرت في بكاء

طويل .

.... ماتعيطيش ياليله .

وبلاش اشوف دموعك دي...

بكره حغلب اللزي ويجمعنا بيت واحد.

... انا خايفه عليك ياسديره ؟

... متخافيش عليه ، انا رايدك يابت.

وعلشانك مش اضرب اللزي بس .

عشانك أهد جبال.

... انا كمان رايداك ياابن عمي..

ومش حكون لحد غيرك .

... إن شاء الله محدش حيقدر يفرق بينا ...

إضحكي يابت شويه علشان أعرف أحطب بكره.

سديري يقترب من ليله ويمسح دموعها بيديه.

... إضحكي بقي ؟

ليله تبتسم .

... أهو ضحكت.

... يالهوري على الضحكة الحلوه دي، والنبي

تضحكي على طول ، خليني أفتكّر ضحكتك

وانا بلاعب اللزي ، علشان تقويني .

.... ابقى خالي بالك على نفسك، عشان

ترجعلي بالسلامه.

... حاجي اخذك واطير بيك ع البيت .

... لا انا عاوزه حصان يجري بينا في الجبل ..

وعلى الجسر، يجري بينا بعيد عن كل الناس

وننزل في حته مافيهاش حد غيرنا.

... ونخلفوا عيال كتيرة وتبقى عيلة السدايرة

ليله تضحك وهي تمس دموعها .

تمضى الايام بنا وتتبدل الفصول فبعد الصيف يأتي الخريف وبعد الشتاء ياتي الربيع ومع تغير الظروف المناخية يتغير لون الأوراق فنجد الأوراق ذابلة في الشتاء، ونجدها صفراء في

الخريف، ونجدها تزدهر في الربيع، ونجدها تنمو في الصيف

كذلك أعمارنا، تنمو على مراحل من عمرنا، ولكن هناك أوراق

تظل ثابتة أو من المفترض فيها كذلك، هي أوراق أخلاقياتنا

قيمنا ، عاداتنا وأعرافنا .

تصل يشعه إلى حسن بعد معاناه وتطمئن عليه وتمنحه

الزاد وتحكي له ماحدث من اللزي مع ليله في يوم زفافها

وماحدث من سديري وطلبه، التحطيب مع اللزي بالعصا

تعاطف مع سديري فهو من نقله للبيت هو وإبن عمه

وأنقذ حياته ولكن حالته الصحية التي رأتها يشعه جعلتها

تطلب منه أن لا يتدخل فصحته لا تسمح

حسن

... إسمعيني يايشعه كويس، انا مش حسيبهم

ومش حسيب سديري وليله .

... بس صحتك ماتتحمّلش.

.. انا مش حظهر قدام حد ولا حد حيعرفني.

... ازاي وحتعمل ايه ؟

...حهرب ليله وسديري .

... ازاي ؟

...ماتشغليش بالك بس كلمي ليله واقنعيها

ولو ربنا نجا سديري من اللزي حهربه هو كمان

روحي أنت ، مفيش وقت.

، حسن قام بتوصيلها إثناء رجوعها ولكن يشعه

إكتفت بالقليل وطلبت منه العودة ، أثناء عودته وجد مراسل

أمامه .

...أيه اللي نزلك يحسن .

... أنا قلت أمشي شويه، سمعت

عن اللي بيحصل في البلد

... حصل أيه ، البلد دي كل يوم في حال .

... اللزي منع جواز ليله من سديري.

.. تقصد اللي شالك حتى البيت وعالج جرحك.

... أيوه هو .

... واللزي ماله ومال جواز سديري.

... اللزي بيحب ليله اللي حيتجوزها سديري

ورفضت اللذي لما طلبها للزواج .

... اوعى تقولي حتساعدهم .

.. حنساعدهم ونقف معاهم.

....وحنقف معاهم إزاي ؟

... حنساعدهم من بعيد لبعيد، من غير ما حد

يحس بينا .

١٢_دار الحمداني

للعمر شموع من عذاب لا تنطفئ والأيام تمر علينا
بلا سلام وهناك من يمارس الوجد في صمت ختى
يعيش ، ليله تسكن بين زوايا الحيرة ، تتحسس خيوط
الوجد ، تلملم ماتبقى من هواء.

يشعه تطرق باب الحمداني تلتفت يميناً ويساراً خوفاً من أن يراها أحد ، ليله من خلف الباب

... مين بيخبط..؟

..أنا يشعه ياليله .

تفتح ليله الباب وتدخل يشعه وهي ترتعش من الخوف.

ليله تسير ييشعه حتى حجرتها.

.. مالك ياشعه بتترعشي ليه.؟

... انا جايه أقولك كلمتين وماشيه على طول .

... كلمتين أيه وتقومي أيه ، أنا ماصدقت اني

شفتك ، اقعدي معاه ، أنا مش على بعضي

يايشعه .

.... انا جيا لك علشان كده .

... فيه أيه ياشعه ؟

... انت لازم تهربي ياليله .؟

...أهرب إزاي وسديري.

.. سديري حيبقى يحصلك.

.. يحصلني على فين ؟

.. طقطقي ودانك معايه ، واسمعيني كويس.

... اديني مطققه وداني ، قولي ياشعه.

... حسن حيحي يهربك، وانت امشي معاه.

...حسن مين ؟.

.. حسن الي ضرب كريم والي ضربوه بالسكينه

وسديري شاله لحد بيتنا وكواله الجرح.

... هو مش ساب البلد..؟

... مش وقته الكلم ده ، انت تهربي معاه وبس.

... أهرب إزاي مع راجل غريب، مش موافقه

على كلامك.

... حسن بقى منناويحب البلد وناسها وبعدين

مش عايش لوحده ، حتقعدني مع خالتي مسعده

وزوجها.

... مين مسعده..؟

...دي الست الي ربت حسن وبيعتبرها زي أمه.

...لا أنا مش حتتعتع من هنا ، وسديري حيغلب

اللزي وحيحي ياخدني.

... ماتضحكيش على نفسك، سديري مش حيقدر

يغلب اللزي وحتى لو قدر عليه ، اللزي ورجالته مش

حيسيويه في حاله ولا حيسيويكي وحيحي ياخذك

عافيه.

... وأبويه وأخويه حمدان .

...كفايه كلام ماعندناش وقت وماتقلقيش على

أبوكي وأخوكي ، التحطيب قرب والبلد مقلوبه.

... وحسن حيحي امتى .

.... مش حيتأخر وحيقولك أمارة ، حيقولك عابر

سبيل وعاوز اعرف طريق الابعاديه ، دلوقتي

انا حمشي ، تقعدي بالعافيه .

١٣- في الدرب

مدن الدهشة أسوارها مليئة بمصابيح تخطف الأبصار ولا زلنا ننتظرُ خفض الضوء حتي نُبصر، نحيا في دنيا الخوف وأرض
الخوف لا تطرح ثمار السعادة، بلدة من الضجيج مصابيحها لا تنطفئ أنظار أهلها معلقة علي أسوار تترقب المجهول

....

الذي يسير في الطريق لمكان التحطيب، حوله هارون

وكريم وباقي الرجل ، يسير بصحبة الذي شاعر الربابة

...شاعر الرباب يمدح الذي في الطريق

... يا لزي ياسبع الرجال

...يافارس ومالي مكانك

... يا أسد على كل الجبال

... تخشى الوجوش مقامك.

.. احد رجال الذي ينطق الجيم دال

... ايوه قول ياعم حدازي (حجازي)

حسن متنكرا في زي بائع مشاط وفلايات، يغطي

وجهه ماعدا عينيه ، يضع على رأسه عمامة كبيرة

يركب على حمار وأمامه شوال كبير فلايات ومشاط

مرسال يقود الحمار

موكب الذي يمر بجوارهم ، شاعر الربابة يمدح

الذي

..... يابطل تخشاه الرجال

..... والكل يخشى مقامك

حسن ينظر للموكب ساخراً ويرد على شاعر الربابه

....وانا غريب ببيع فلايات
....وبكره يالزي حيتهم عيالك.
مرسال معترضاً وغازباً من حسن .
....حتودينا في داهيه إن شاءالله.
يحاول أن يغطي على حسن وينادي بصوت عالي
... معانا الفلايات للسمره والكجيله
....تنفع لكل البنات ...البيضا والطويله
حسن من بعيد يلح سديري وهو يودع ليله
وبصحبه الحمداني وحمدان ، ينتهي سديري
من وداع ليله ويتجه الى الوسعاية حيث مكان
التحطيب ،وتعلق نظر ليله على سديري وهو
يسير ويختلس بعض النظرات إليها ، إختفى سديري
وعمه وإبن عمه وليله تسمرت قدميها ، إقترب حسن
ومرسال منها، مرسال يقترب منها .
.. بنبيع الفلايات للصبايا الملاح .
ليله
.... مش عاوزه حاجه ، امشوا من قدامي.
حسن
... انا عابر سبيل بسأل عن طريق الأبعادية.
ليله سمعت كلمة الإبعادية وعلتها الدهشة.
...أنت حسن ..؟

... أيوه ، دخلينا بسرعه.

يدخلان خلف ليله وتغلق الباب.

.....

يصل موكب اللزي للوسعاية مكان التحطيب

وشاعر الربابة لا يتوقف .

.... يالزي ياابو عميمه وشال

.... يابدر بين الرجال

.... ياابو زند في الضرب طایل

رجال اللزي يهللون وكأنهم في نزهة

في مدخل بيت الحمداني يقف حسن مع ليله.

...معلش ياليله ، أنا مقدر الي أنت فيه ، وماتقلقيش

مني ، إعتبريني زي أخوكي.

ليله تبكي .

... إزاي حهرب معاك .

أهل البلد يقولوا عليه ايه..

وابويه وجوزي واخويه،

،مش سهله ، إحنا صعايده.

.... أهل البلد وسديري وأ

بوك وأخوك حيقدرؤا الظروف

... اللزي مش حيسيبهم في حالهم.

... ولا حسيبك ويسيبهم إلا لو وافقتي عليه.

... أنا لو وافقت عليه ، أبقي قتلت نفسي...

وكسرت بنفس كل بت في البلد.
،اتحكموا في رزقنا ومش مكفيهم.
كمان بيتحكموا في حياتنا.
.....يبقى مافيش حل غير تيجي معايا.
يا لا بينا ، مفيش وقت
.... ماشي يا حسن .
حسن يمسك بشوال كبير .
.. معلىش ياليله ، حتدخلي الشوال ده .
... وسديري وأبويه وإخويه.
... حيحصلوكي ماتقلقيش ، مفيش وقت.
تدخل ليله داخل الشوال ويحملها حسن
ويخرج بها ويضعها أمامه على الحمار ويبدأ في
تهريبها .
في الوسعاية حيث مكان مبارزة التحطيب بين اللزي
وسديري ، أهل البلد يقفون في جانب في حالة ترقب
وفي الجانب المقابل جعفر واللزي وباقي رجالهم.
جعفر محدثا شاعر الربابة.
.... كفايه كده ..
يعود محدثاً اللزي
... حطبوا بقى وخلصونا .
هارون
نخليهم يدقوا الطبول

...خليهم يتنيلوا ، لما نشوف أخرة ليلة

اللي هوست اللزي .

اللزي

.. أصلك ماشفتهاش جنابك.

.... يعني حشوف بنت الوالي ياخي.

... دي ليله وهي ليله وأحلي من كل ليله.

...انت حتشعرلي فيها ، خلصنا في يومك

اللي مش معدي ده .

محدثاً ماسكي الطبول

... دقوا الطبول .

تدق الطبول وفي جانب أهل القرية يستعد

سديري للدخول ودعوات أهل القرية .

...ارمنيوس

... في عناية الرب ياابني.

الشيخ آدم

.....تجلد بالصبر ياسديري ولا تخشى

هذا البغل واتكل على الله .

الحمد اني

... ربنا معاك ياسديري ياابني .

سديري يتجه إلى منتصف الوسعايه ممسكا بعصاه

واللزي يقف امامه مستهيناً ومستهتراً به، يدوران

في دائرة كاملة.

الذي ساخرا

...بتتحداني أنا ياوادم ، وقدر حنكك ينطقها.

.... وأتحدى أي مخلوق يقف في طريقي

أنا وليله.

.. طيب وريني يا ابن بتاع الطعميه.

... أنت تحتطب ولا تغلط.

يبدأ تحطيط الموت بينهما، بين ضربات هنا وهناك

وصد هنا وهناك.

يضرب سديري ضربة قوية، يتفادها الذي وتنزل

على الأرض، ويضحك رجال الذي ويهللون لبراعة

الذي .

الشيخ آدم محدثاً أرمنيوس

... يضحكوا على إبه يامقدس.

...سديري ضرب الذي ضربه تفادها الذي

وجات على الأرض

... خبيك الله عليك ياسديري .

صف لي التحطيط يامقدس

عبدالمتجلي الاخنف معترضاً

...يامولانا بلاش كلام ، خلينا نتفرج .

الشيخ آدم

.. اسكت ياخنزير، عاوز أتابع التحطيط

وكأني أراه ،

محدثاً ارمنيوس

صف لي يامقدس الضربات، الأفقي

منها والسفلي.

ارمنيوس

حوصفك ياشيخ آدم ، بص .

.. بص ، بص أيه ؟ يخيبك ربنا يامقدس

بقولك سمعلي مش وريني ، هو أنا ببص

ياراجل

ارمنيوس

... حوصفك خلاص ، اللزي هجم على

سديري وضربه ضربة .

....صف لي نوع الضربة ، افقية ام رأسية

شمالية أم غربية.

في الجانب الآخر جعفر مستاء من استعراض

اللزي وتطويله للتخطيط، محدثاً هارون.

.... اللزي عمال يجلع ومش عاوز يضربه.

... انت مش عارف اللزي وعنطزته، فرحان

بالهيسة والناس وجايب شاعر ربابة .

... قوله يخلصنا من وجع الدماغ ده .

هارون يقترب من اللزي ويهمس له.

... قوم بيه يالزي وقُض اليوم ده .

الذي يقترب من سديري.

... حوريك التحطيط على اصوله، واخلص عليك.

يوجه ضربه قوية لسديري، الذي يقع على الأرض

من قوة الضربة ، يقف على قدميه محاولاً ضرب

الذي، الذي يتفادى الضربة ،ويوجه له ضربة قوية

في صدره فخر سديري ساقطاً على الأرض وهو

يصرخ .

...آه...

. حياتنا بين صفحتين، حلم وأمنية، وغالباً نقف أمام الصفحتين

منتظرين، أحيانا نتصنع البرود لنخفي ما بداخلنا من أحزان.

أهل القرية ينسحبون من المشهد خوفاً من الذي

جعفر ينسحب أيضاً وخلفه بعض الرجال ولم يتبقى

سوى الذي والحمداني وإبنة حمدان والشيخ آدم

والمقدس ارمنيوس ، الذي مقترباً من الحمداني

.... بينا على الدار ياحمداني .

أدرك الحمداني أن الذي يريد ليله بالقوة ولن يستطيع

أن يمنعه وقال له وهو صاغراً ودامعاً وهو يهز رأسه .

... الي تشوفه .

حمدان في حيرة بين سديري الملقى على

الأرض وأبيه المغلوب على أمره ، أخيراً قرر أن

يذهب مع أبيه خوفاً عليه من الذي ورد الفعل

المرتقب من ليلة. إختفى معهم في مشهد سيرهم

إلى دار الحمداني .

سديري ملقى على الأرض وارمنيوس ينظر إليه
في حالة حزن وشفقة ، الشيخ آدم يشعر بالصمت
والسكون .

... ماذا حدث يامقدس ، السكون يخيم على المكان

مش سامع زيطة ولا زمبليطه.

... اللزي ضرب سديري.

... خيبة الله عليك ياسديري، هو فين ؟.

... تعالى نشوفه ، الناس كلها مشيت وتركوه

جثة على الأرض ، هو لا يتحرك.

يتجهون نحو سديري والشيخ آدم يجثي على ركبتيه

محاولاً تحسس النبض فيه ، يضع رأسه على صدر

سديري ويستمع لدقات قلبه .

.... لا يزال فيه نفس يامقدس

... حمداً للرب على سلامته

.... احمل هذا الموكوس يامقدس وخذه لداري

لأداويه .

المقدس يرفع سديري ويحمله على كتفه لمنزل

الشيخ آدم .

السلوتي يصرخ بصوت عالي باكياً وهو يجري في الدرب

سديري مات

والسبع خطف ليله وطار

، يسير في الدروب

يردد

سديري مات وليله خطفها السبع وطار

يصل الشيخ آدم إلى داره بصحبة ارمنيوس

حاملاً حسن ويطرق باب بيته ويسمع صوت

عزیزه زوجته من الداخل .

.... مين اللي بيخبط..؟

....إفتحي يا اللي ربنا بلاني بيكي.

... تبقى الشيخ آدم .؟

...لازم أكون الشيخ آدم ماهو أنا المبلي.

تفتح عزيزة الباب ويدخل ادم وخلفه المقدس حاملاً

سديري ، ارمنيوس يضع سديري على أقرب دكة.

عزيزة زوجة الشيخ آدم .

.... سديري ماله .

الشيخ آدم

... إبعدي بس أنت وهو حيكون كويس .

الشيخ ادم يقوم بتمزيق جلباب سديري وأكمامه

... ورم شديد في الكتف والجانب اليمين.

ارمنيوس

.. كده يبقى مافيش كسور إن شاء الله

الشيخ آدم لزوجته

... ادخلي يا وليه هاتي شوية ميه سخنه

واعجني عجينه نلخ بيها الورم .

تختفي عزيزة لتجهيز الماء الساخن

ويعود الشيخ آدم محدثاً سديري الذي

لا يشعر به .

... عاملي فيها سبع البرمبه وعاوز تغلب

اللزّي !.

.... نصيبه كده وهو كان حيعمل ايه..؟

....ولماذا كل هذا..؟

أمن أجل ليله يلقي

بنفسه على اللزّي .

... بنت عمه وهو بيعشقها .

، ما انت عارف؟

...آه من العشق يامقدس.

أوله عشق ، وآخره فسق.

.... ازاي ياشيخ آدم .

الحب بيحيي الروح.

... أي روح يامقدس .

العشق هوى يفسد القلب.

١٤- في الجبل

أصعب ما في الليل أنه مأوي للأرواح المعذبة وملجأ لأيتام الحنين وسبيل للمستأنسين بالوجع، الفراق قاتل.. والشوق سفاح.. والقرب حلم.. والنسيان قطار لا يتوقف في محطة الألم..... والعجز حالة فقدت وجود المداوي..

حسن ومرسال يترقبان أحوال البلده من بعيد

... والعمل يامر سال ، البت حتموت نفسها على جوزها.

... وإحنا حنقدر نعمل أيه ؟ نروحوا نقتلوا اللزي علشان

ترتاح ، وياريت نقدر ، إحنا هربناها بالعافيه.

... تلاقي سديري خلص تحطيب مع اللزي؟

.... تلاقي سديري إتكل على الله

... فال الله ولا فالك يافقر أنت .

... انت شفت اللزي عامل إزاي، زي التور، حيعمل

أيه سديري المسكين معاه .

حسن يلمح السلوتي جاي يصرخ

... ليله خطفها السبع وسديري مات .

مرسال غاضباً

... يخرّب بيتك ياسلوتي ، أهو فضحنا.

يقترّب السلوتي منهم ومرسال ينهره .

.... سبع مين اللي خطف ليله ، إحنا مش

قولنا ماحدث يعرف حاجه.

السلوتي

أنا قلت السبع ماقولتش حسن .

حسن

استنى أنت يامر سال

محدثاً السلوتي

... أنت بتقول سديري مات .

... أيوه اللزي ضربه وموته.

يقترب حسن من السلوتي ويضع يده على كتفه

ماتقولش أنه مات قدام ليله ياسلوتي دلوقتي.

١٥- امام دار الحمداني

يقف اللزي هو ورجاله أمام دار الحمداني منتظراً

خروج ليلة من الداخل .

داخل دار الحمداني حمدان وأبيه يبحثان عن ليلة

الحمداني ينادي .

.... انت فين ياليله .

... ليله مش في الدار يابا .

.....حتكون راحت فين بس؟

،ياترى تكون عملت في نفسها حاجه ..

محدثا إبنه

.... دور عليها كويس ياابني .

.... قلبت البيت حته حته مالهاش أثر.

... حطلع اقول للزي أيه دلوقتي ، حيفكر إننا

خبيناها.

خارج دار الحمداني ، بدأ يمر الكثير من الوقت

وهو ينتظر حتي أن الشمس أوشكت على المغيب

محدثاً هارون.

.... أيه الحكايه ..؟ كل الوقت ده بيحيب ليلة.

..... تلاقيها معافرة معاهم ومش راضيه تيجي.

... معافرة ، زي ماأنت قلت .

اللزي يضرب الباب بقدمه ويدخل الدار وخلفه هارون

وبعض الرجال . يجد الحمداني وإبنه واقفان وهما

في حالة توتر ، فدخله إليهم زادهم توتراً.

.... فين ليله ياحمداني.

....والله ماعرف ، قلبت عليها البيت، مش موجوده.

.... تبقى هربتھا ياحمداني قبل التحطیب.

.... أنا لاهربت ولا نیلت حاجة

بيكي

.... یاتری أنت فين یابنتي ..؟

... انت حتعملهم علیه، مایخلش علیه الکلام ده.

.... والله ماأعرف عنها حاجه .

اللزي لهارون .

... إقلبوا علیها البلد کلها ، ماتخلوش بیت

غير لما تفتشوه .

... حنفتشوا بیوت البلد بیت بیت ..؟

وحته حته وحنجیوها .

اللزي یقترب من الحمدان .

... أنا ینضحك علیه یاحمداني .

یضرب الحمداني بقوة بالعصا، حاول حمدان أن یدافع

عنه أبیه فضربه وأسقطه أرضاً على أبیه وخرج هو ورجاله

اللزي لهارون

...ولعوا في البيت ده .

عاوز ناره ماتنطفیش .

وبعدها روحوا فتشوا علیها .

يتركهم ويمشي، هارون والرجال
يشعلان النار في الدار ، وأمسكت النيران سريعاً
في المنزل لوجود البوص أعلى الحجرات. موقف
سلمي لأهل القرية ، فمنذ إنتهاء التحطيط أغلقوا
على أنفسهم دورهم ، ترتفع السنة النيران إلى
أعلى ، سديري يفوق ويستमित لإنقاذ أبيه، لم يستطع
حملة وجره من يديه قبل أن يسقط سقف الخوص
المشتعل . استطاع إخراج والده قبل سقوط السقف
بثوان قليلة.

حسن يلمح الحريق من مكانه في الجبل ويقف

بجواره مرسال والسلوتي .

.... شايف النار يامرسال ؟.

.... شكله بيت بيتحرق . ياترى بيت مين.

.... انا عارف بيت مين ده ؟

حسن للسلوتي

... إنزل ياسلوتي شوف أيه الأخبار وبيت مين

ده اللي بيتحرك .

... ماشي حسن .

أنا بحب أسمع كلامك أنت بس

أدخل اقول لليه سديري مات.

... روح ياسلوتي وأنا حقولها .

يتجه حسن لداخل المغارة وبعد إن تردد في إبلاغ

ليه بوفاة سديري، أبلغها بوفاة حسن وكانت صدمتها كبيرة

عجزت مسعدة أن تخفف عنها وباءت محاولات رحان وحسن في التخفيف عنها بالفشل وانهارت ليله تماماً

١٦- في الطريق

نخاف فيشتد بنا الحذر ونُكثّر من النفاق ونسكن خلف الجدران وشهيقنا عذاب وزفيرنا مللوصرنا جثث محنطة
وأشباح ولا فرق بيننا وبين خيال الظل، أصبح الأمس خنجر في الظهر واليوم أصبح سوط يجلد ظهورنا والغد مدفع ننتظر
من طلقة... .

حمدان يحمل أبيه وهو يهرول ، حتى وصل الماسورة

على ترعة ، تصل الجسر بالناحية الأخرى من الترعة

هي منطقة حقول، حمدان لا يشعر بالتعب رغم

ما يبزله من جهد لإنقاذ أبيه ، يحمله ويزحف على

الماسورة ، أبيه في غيبوبة لا يشعر بشئ، يعبر

حمدان الماسوره ويأخذ بعض الماء من الترعة في كفيه ويغسل وجه أبيه ، ثم يحمله إلى الجسر، ثم يدخل حقول

الذرة الرفيعة. عندما اختفى داخل الحقل بأبيه أنزله على

الارض . محاولاً إفاقته.

..... أبويه ، رد عليه يابا ، رد عليه .

أنا إبنك حمدان .

بيكي

.... ماليش غيرك دلوقتي ومالكش غيري.

بيكي بحرقه

.... اختي ومش عارفين فين ، وبيتنا واتحرق.

وسديري مات .

بدأ الحمداني يفيق من غيبوبته بهلوسه.

.... ليله أنت فين يابنتي .

... متخفش يابا حنلاقيها .

أهم حاجة أنت ونفسك معاه.

١٧- دار الشيخ آدم

حيرة مرتعشة خلف ألف باب وباب والكلمات مغلقة والنوافذ تعاني من خربشات الوجد، نصت لهذا اللصمت الآتي من خلف السكون فيزعجنا هذا الضجيج الصخب داخل حياة، تهاجر فيها كل الإجابات، وونتظر أن نصرخ رفقا بنا أيتها السماء فأحلامنا المصلوبة علي أسوارك بلا خطيئة. ..

قام الشيخ آدم بوضع لبخه من عجين على أماكن
الورم وربط مواضع الورم والمقدس ارمنيوس لا يزال
معه ، طرق على الباب ، تفتتح عزيزة ويدخل شحاته.

مهرولا ومتوترا.

...أبوي في مصيبة .

... ماذا هناك يا ابن امك.

.... رجالة اللزي ييفتشوا في البيوت كلها

الي في البلد.

... ولماذا هذا التفتيش ؟

.... سمعت أنهم بيدوروا على ليله.

الشيخ آدم ساخراً

... دي مش ليله الي ما عاوزه تعدي .

ارمنيوس

... ومالها ليله ..؟

...محدث لاقبها ولا عارفين راحت فين ؟

ارمنيوس

... يبقى لازم نخبي سديري دلوقتي.

الشيخ آدم

... وحنخبه فين في المخول ولا الصومعة

كل البيت مكشوف.

شحاته

....نخبه في الخايه بتاعة الدقيق.

الشيخ آدم ساخراً

...لا مفتح زي امك، اسكت يا ابن امك.

شحاته

... نخطوه عند الفرن ونخطوا عليه بوص

وحطب وعندنا كتير.

ارمنيوس مستحسنًا كلام شحاته.

....عفارم عليك ياواد يا شحاته، ده أحسن مكان

ماياخدوش بالهم منه .

ارمنيوس للشيخ آدم

....أهو شحاته فكر في اللي مافكرناش فيه.

.. في تلك الحالة ، يكون ابن أبيه.

الشيخ آدم لشحاته

...يتمرس زندك يا ابن أبيك.

يلتفت لارمنيوس

...شفت يامقدس، هذا الشبل من ذاك الأسد.

يشير لنفسه وشحاته ممتعضاً

...ماكنت ابن أمي دلوقت يابا.

... ابن امك في المعيله ، وابن ابيك في المرحله.

ارمنيوس يضحك ، يحمل سديري ناحية الفرن

ويقوم شحاته بوضع حصير ، يضع ارمنيوس
سديري على الحصير ،ثم يُلقي عليه ببطانية
حتى لا يجرحه الصوت ،وشحاته يحمل البوص
ويضعه فوقه حتى غطاه تماما .

ارمنيوس

.. خرج أنا البيت تلاقي البنات قلقانين عليه.

الشيخ آدم

...كتر خيرك يامقدس ، تعبناك اليوم.

١٨- دار ارمنيوس

صعب أن تسأل الأمل والأمل بحاجة إلى أمل

نغدوا عراة منبوذين من الفضيلة سكاكين القهر تطعننا دموعنا حمراء بلون الدم. مرتعش وجهك أيها الحلم فلا تؤلمنا
بالنظر إليك، الخوف يطاردنا وعصا القسوة تقودنا للإختباء
أطفال الحيرة تهتك أعراضنا وتضاجعنا بقسوة لا مكان للأمان...

يشعه ومريم في حالة قلق على ارمنيوس

....إبوكي إتعوق (إتأخر) علينا.

....أطلع أبص عليه ؟

.. لا أنت ماتطلعيش ثاني .

يسمعون طرق على الباب ،

يشعه

... أبونا جه .

تتجه نحو الباب وتفتحه يدخل ارمنيوس ، يبدو

الإرهاق عليه ، يجلس على أقرب دكة.

...عاملين ايه يابنات .

مريم

أيه اللي عوقك كده يابا.

...يوم طويل يابنتي.

يشعه

...كنت حنزل ادور عليك .

...تدوري فين ، دي البلد مقلوبه.

،محدث فيكم يطلع.

مريم تنظر إلى يشعه وتعود لأبيها.

...وانت كنت فين طول اليوم يابا.

... اللزي لما ضرب سديري ،أهل البلد سابوه .

ولحقناه أنا والشيخ آدم .

يشعه

هو سديري مامتش ..؟

... لا يابنتي الكل فكر أنه مات ، ولقينا فيه نفس.

وشلناه على بيت الشيخ آدم .

يشعه تؤنب نفسها

... ياغلبك يايشعه .

تلاقي ليله عرفت أنه مات.

ارمنيوس والدهشة تعلوا وجهه.

.... ليله عرفت..؟

عرفت أيه وهي فين .؟

يشعه تتلعثم في الرد.

ارمنيوس بفضول

... انت مخبيه عني حاجه يايشعه .

، قولي فيه أيه.

... انا قلت للسلوتي يبلغ حسن أن سديري مات.

ويخلي حسن يبلغ ليله.

.... هي ليله عند حسن .

.... أيوه يابا ،حسن هربها وقت التحطيب.

.... وحسن يعرف ليله من فين ؟ علشان يهربها.

يشعة تتردد وتتلعثم في الرد
.... انت الي طلبتي من حسن يهرب ليله.
....ايوه يابا.
.... وانت شايفه صحة حسن تتحمل.
ماخفتيش عليه.
.... سامحني يابا ،أنا مقدرتش اشوف
بهذلة ليله واقف ساكته.
....وانت حتصلحي الكون ياشعه.
..... سامحني يابا ، أنا غلطانه.

١٩- البحث عن ليلة

إذا اتفق الطغاة نهبوا الوطن وإن إختلفوا أحرقوه وإن صمتوا ملوه بالخيانة وباعوه، هل نحن في حاجة إلى علاج ... هل تم إصابتنا بفيروس للهلوسة وعدم القدرة على التفكير والشعور بالإستسلام والخمول لقدّر تخيلوا أنهم فرضوه علينا . رغم أن المشيئة لله.

رجال اللّذي دخلوا كل بيوت البلدة وخرّبوها وهم
يبحثون عن ليلة ، وصلوا دار الشيخ آدم ، طرّقوا الباب
بعنف ، الشيخ آدم أدرك أنهم رجال اللّذي حضروا بحثا
عن ليلة . لم يترك شحاته يفتح الباب وفتح الباب بنفسه
..... ماهذا الخبيط ؟

طلب

....ماشفتش ليله .

....لا شفت ليله ولا نهاره واتكلوا على

الله يافروخ اللّذي .

... يبقى تسيبنا نفتش الدار.

.... هي بيوت الشيوخ بتفتش يافروخ

الدجاج ، ياخنازير.

طلب يدفع الشيخ آدم ويدخل إلى الداخل وخلفه

حفنة من الرجال ، يفتشون الدار ولا يجدون شيئاً

بكر معتذراً للشيخ آدم

... معلش يامولانا ، اوعي تكون زعلت.

.... مش إنتهيتوا من التفتيش .

انسحبوا ياخنازير.

٢٠- حجرة لوا حظ

الحب .. هو ذلك الشعور الخفي، الذي يتجول في كل مكان ويطوف الدنيا بحثاً عن فرصته المنتظرة ليداعب الإحساس ..

ويسحر الأعين ليتسلل بهدوء ويستقر في غفلة من العقل..

ورغمًا عنك ، داخل تجاويف القلب ليمتلك الروح والوجدان ليسيطر على كل كيان الإنسان.....

... هو ذلك الشعور الذي يملك الإنسان في داخله

ويطوف به العالم حيث يشاء بأفراحه وأحزانه

يتجول كل مكان فوق زبد البحر يمشي دون أن يغوص في أعماقه...

...هو ذلك الوباء اللذيذ المعدي الذي يصيب جميع الكائنات بدون إستثناء.

الأحداث المتلاحقة ، جعلت لوا حظ في حالة ترقب وصول

حليمه وما إن وصلت حتى طارت بها إلى حجرتها.

...تفتكري ليله تكون راحت فين..؟

...علمي علمك ياسني ، فيه اللي يقول

رمت نفسها في الترعه ، وفيه اللي يقول

طفشت ، لكن انا سمعت الواد سلوتي

بيصرخ في الدرب بيقول

....سديري مات وليله اخدها السبع وطار.

... سبع ، سبع أيه ، يقصد وحش.

...لا وحش ايه ، اكيد يقصد بني آدم

مفيش غير حسن اللي ممكن يعمل كده.

... أنت بتقولي أيه ، حسن مش هج ومشي

... اللي بيحصل ده وراه حد زي حسن.

... يعني حسن ماهجش كده وموجود

وأكيد في الجبل.

يا فرحتك يا لواحظ.

هي لازلت تنتظر صوت العصفور الأتي من المدى البعيد وتحلم أن يخترق خفافيش الظلام، أحلامها به عذراء كطفل وليد
وشقاء و عذاب لا يحتمل المزيد، قمة الألم أن تشتاق لمن لن تراه وصعب أن تجد له بديلا وتعلم أنه لن يتكرر.
هي كانت تنتظره على محطة الشوق .تترقب حافلة الأمل رغم هبوب العاصفة. . .

... بتقولي أيه ياستي.

فرحه غيرعاديه ظهرت على لواحظ..

...بقول أنت أحلى حليمه في الدنيا كلها

ياه نفسي اشوفه ياربي ..؟

... تشوفي مين ياستي ..؟

... بقول يعني محدش شاف حسن ..؟

.... لا محدش شافه ، كله كلام .

... وسديري فين ، بيقولوا وقع ميت.

وجثته اختفت.

. والنبي دي كمان تلاقي حسن وراها.

.... ليه هو مين حسن .

مايكنش ابوزيد الهلالي.

.... الناس شايفين في حسن أكثر من كده،

بيستنوا أخباره زي اللي مستني عياله

يبعتوله جواب من الغربه.

.... وانا مستنيه أكثر منهم، نفسي أشوفه .

ألمي عيني منه .

.... بتقولي أيه ياستي .

....حليمه أنا عاوزه اشوف حسن ده ، انا

رسماله صوره حلوه جوايه ، ياريت يكون

زي منا رسماه .

.... بس إحنا مش عارفين الكلام صح ولا

غلط، موجود ولا هج من البلد.

... أكيد يشعه عارفه كل حاجه .

أنا عاوزة اشوفها.

... وانت حتشوفها إزاي ياست لواحق

ومش حتقدر تجيلك هنا.

... أشوفها في أي حته ، ومش مهم إزاي.

... أنت وقعتي ياستي وعشقتي حسن.

...مش عارفه ، ولكن بفرح بإسمه،

بسيرته

...أبوي لو عرف حيدفنك بالحيا.

... مش مهم أي حاجه ، ومش خايفه

من حاجه ،المهم شوفي لي طريقه اقابل

بيها يشعه .

... أنا عندي طريقه تشوفها بيها.

...عندك وساكته ، قولي يا حليمه

قولي بسرعه .

... يوم الخميس الي جاي ، كل الحريم

حبروحوا يتقابلوا في الجبل ، وانا حبيب

يشعه واخدها معايه.

.... والنسوان بيعملوا أیه فی الجبل .

.... بیطلعوا مع بعض ، کل واحدہ شایله

بلاص ملیانه میه ، ویطلعوا مع بعض جماعه

یغنوا ویهیصوا ویتنضفوا هناك.

ینضفوا نفسهم، ینضفوا کل حتہ فی جسمهم

ولما یرجعوا البیت ، کل واحدہ

تکون جهزت نفسها لراجلها.

... والبنات بیروحوا لیہ.

... علشان یتعلموا ویتودکوا علی کده .

....انا حاجي معاکم حتی لو أبویه موافقش.

٢١- داخل المغارة

حديث الدمع قاتل وتسكت أمامه كل الأبجديات
عندما يتحدث الدمع ، يصمت كل شئ، تصمت الشمس
فقط يتحدث السكون ، ليله تدور حول نفسها ، تبحث
عن متنفس ، تود لو تصرخ بأعلى صوتها آه...
لا يوجد أصدق من حديث الدمع، رحان وحسن ومسعده
ومرسال ينظرون لها في شفقة على حالها، لم يتبقى
لها حلم تعانقه
مسعده
إستهدي بالله يابنتي.
ليله
.....الجرح كبير ياخاله، محدش يحس بالنار اللي.
جوايه
تبكي بحرقه
... نار موت جوزي ، ونار أبويه ونار أخويه.
..هي المحبوسة بسبب حلم ، حكمت عليها
محكمة الوجد ، ويبقى الأمل حبيسا في سجن الأحلام المهرقة...وطقساً ممارسه في محراب الوجد ونخشى أن نبوح به
فتتخطفنا أشباح الظلام..
رحان
...بكره ربنا حيطمنا ، فيه حاجات مش فاهمينها
جثة سديري وبيقولوا مش موجوده ، وكمان..
لما اتحرق البيت مالقيوش أثر لابوكي واخوكي.

.... أكيد اللزي اتخلص منهم ومن جثة سديري.

حسن

.....مفيش قدامنا غير الإنتظار ياليه.

ماتحسسينش بالذنب .

أنا كنت بساعدك مش أكثر.

..... أنت مالکش ذنب يا حسن ، ومنه لله البعيد.

ربنا ينتقم منه .

حسن

... يعني لو كنت موجودة في البلد واللزي

ضرب سديري ،كنت حتوافقي على اللزي

علشان ابوي واخوي يعيشوا .

... مش عارفه يا حسن وقتها كنت حعمل ايه.

حاولتاعمل انا حاجه وانزع الخوف من أهل البلد.

.... انت أشجع من رجاله كتير في البلد ياليه.

٢٢- منطقة نخيل

قلوب وملاها العفن، وبلد السكن فيها كفن .. ووطن الظلم فيه كل ثانية بينولد...والحق مصلوب بيتجلد، الحمداني

وحمدان لا يسألان عن الغد ويعتبرانه الأسوأ، لغياب

العدالة وحبس الضمير.

حمدان ينتقل بأبيه من مكان لمكان متخفياً داخل

الحقول، ضجيج الصمت يطحن عظامهما، ماذا فعلوا

لينالوا هذا العقاب البائس، يدخلون من ألم لألم

بلا راحة، من لا يعرف الجروح، لا يشعر بها ويسخر

منها، زلات البشر عندما تزيد عن المعقول تتحول

بها الحياة لغابة يفترس فيها القوي الضعيف، المرء

قد ينسى الأسى ولكن تظل الإساءة عالقة داخله

لاتتزعزع، مستقبل مجهول وفي حكم العدم، يعيشان

طريدان، ليس هناك سفينة يسبحون في اتجاهها

ولا حتى قطار إنتظار ليوم أفضل، تُبعثرهما الريح

من مكان لمكان .

الحمداني ملقى على الأرض بأوجاعه، ويدخل إليه حمدان

حاملاً بعض أعواد الملوخية ونبات الرجله، فشل في إحضار

الفاكهة .

... معلش يابا، مالمقتش قدامي غير

ملوخيه خضراء وشوية رجله، أهى

حاجه تنفع تسد بيها جوعك.

....أكل أيه يا حمدان يا بني وفين النفس

اللي تاكل ، كل حاجه ضاعت، ليله بنتي
وسديري ابن أخويه ، حتى الدار اللي كانت
مآويانا إتحرق ، بقينا مطايرد ولا، اللي عملين
عمله وهربوا بيها.

... ماتفكرش في حاجه دلوقت يابا
أهم حاجة تقوملنا بالسلامة، وكل حاجه
حتتصلح إن شاء الله .

... اللي إنكسر ماييتصلحش ياحمدان.
.... يابا أنت اللي بتقول كده ،أنت
طول عمرك ،بتصبرني ،وإيمانك بالله قوي
ماتضعفش يابا ، خليني قوي بيك.

ربنا كبير والظلم مهما طالت أيامه له نهايه
... كل يابا ، علشان أنا كمان أكل.

يتناول الحمداني بعض نبات الرجله
.... ياترى انت فين ياليله .

... أنت قوم بالسلامه وندور عليها مع بعض.

٢٣- في المغاره

عندما تعشق إنسانا تمارس دور الإشتياق مع
الكثير، تشتاق للأماكن، للحروف، تشتاق لبعض
الأحاسيس، الجميع نائمون وحسن خارج المغارة
هي وحدها ليله تمارس هواية السهر، هي هواية
كل عاشق ، ففيه قد يكون فرح وكثيره حزن.
الفكر دائما يحارب النوم ويطرده ويغنيها عنه.
ليله تعيد شريط الذكريات.تتذكر كلمات سديري
.... ماتعيطيش ياليله،بلاش دموعك دي
بكره حغلب اللزي ويجمعنا بيت واحد
.... انا خايفه عليك ياسديري
.... متخافيش عليه ، أنا رايدك
وعشانك مش اضرب اللزي
عشانك أهد جبال .
تبكي ليله بحرقة وشلال هادر من الدموع يُغرق وجهها.

٢٤- دار الشيخ آدم

في الحب حياة ومناجاه، قلوبنا تعيش لأن هناك من
نحبه، نفرح معه ، نبكي معه ،نضحى من أجله
وموت من أجله، قلوبنا تعيش لأنها ترى الأمل
وراء الجبل وترى القمر قادم والليل راحل.
...كأنهما على موعد بلقاء روعي، سديري يجلس
على الطبلية يتناول الطعام مع الشيخ آدم وإبنه
شحاته ، يداعب شريط الذكريات وكأنه يرد على ليله.
.....إبقى خلي بالك ياسديري على نفسك..
علشان تجيلي بالسلامه .
.... حاجي واخذك واطير بيك على .
.... لا أنا عاوزه حصان يجري بينا في الجبل
وعلى الجسر ، بعيد عن كل الناس ونزلوا
في حته مافيهاش بشر.
.....ونخلفوا عيال كتيرة ونعملوا عيلة كبيرة
عيلة السدايرة.
يتذكرها وهي تضحك، يقطع خياله الشيخ آدم
.... أيه رأيك ياسديري في فطير خالتك عزيزه.
.... تسلم إيديها ، قولي يامولانا هو عمي ماجاش
يطل عليه ليه ، لا هو ولا حمدان .
..... شد حيلك بس أنت وماتفكرش في حاجه

دلوقت .

عزيزة

ما تقوله يا آدم ، سديري لازم يعرف كل حاجه.

.... اسكتي أنت ياوش المصايب وروحي إعملي لينا

كوبايتين شاي .

.... ماهو لازم يعرف، أنت بتخبي عليه ليه؟

.... يا وليه يا بوز الإخص روعي إعملي الشاي.

..... فيه أيه ياعمي .

... مفيش حاجه ياإبني، خالتك عزيزه كبرت وخرفت.

عزيزة غاضبة على من كلام الشيخ آدم

.... أنا كبرت وخرفت ياراجل يادون، طيب والله

لا اقوله أنا كل حاجه ..؟

عمك وإبن عمك اللزي

حرقلهم البيت وما حدش يعرف عنهم حاجه.

.....الله يخرب بيتك ياعزيزه، بهيمه من فصيلة

البقر.

.... الكلام ده صح ياشيخ آدم.

.... أيوه صح ياإبني .

.... وليله ياعمي .

... والله ياإبني أنا كرهت الليالي.

...مش فاهم ياشيخ ادم .

.... بيقولوا إن اللزي لما ضربك وراح

مع عمك ياخذها من الدار مالمقيوهاش

ومحدث يعرف هي فين ، وعلشان

كده ، اللزي اتجن وحرقت البيت بعمك

وإبن عمك والظاهر طلّعوا من الحريقه

مابنش اثر ليهم بعد ماطفى الحريق.

سديري يصرخ

... لا ، لا ، حرام .

٢٥- مضيقة جعفر

القلب الشرير ، لا يرى الجنة ، ولا يعرفها، هو
يعتقد في الجحيم ، هو أرض مقفرة و وقاحلة
تلونت تربتها بالقسوة ، لم تتعلم من الخصرة
شيئاً وترتضي باللون الأخضر، هي تأملت الجبال
وتعلمت من الحجر كيف تتحجر.
قوى الشر تتجمع للخراب ، بشر تخلوا عن
هويتهم، عمتهم القوة، وغرتهم أنفسهم ووضعوا
سيوفهم على رقاب البشر. كل فرعون خلية من السحرة مهمتها إغتصاب عقول الناس.
جعفر وهارون والليزي يجلسون جلسة حساب
وعتاب ، ترقب وحذر .

جعفر

... أنت كفاياك ليله والرمح وراها يالزي.
... وهي فين ؟.. ياريت أعرف طريقها.
جعفر يُعنف الليزي .
.....ولا حتعرف ليها طريق ، أنت بتشتغل بإيدك
مش بدماغك ، لم الدور وعاوزين نفوق لمصالحنا.

هارون

.... كلام جنابك صح .
والليزي العشق عماه
اديك ضربت سديري،
وحرقت دار الحمداني وإبنه

وبرضوا ما طُلتهاش .

.....كفايه ياهارون ، أنا عارفك ، عاوز ميته

وتشبع فيها لطم .

.... هارون مغلطش يالزي ، وأنت بتلطش

ومش عارف بتعمل أيه .

....اه وربنا ،الذي بيلطش .

حتى انا همشي وراه اعمى،

.... تقدروا تقولولي جثة سديري الي

انضرب فين ؟، تقدر تقولي يالزي الحمداني

وإبنه الي حرقت بيهم الدار ومالقيتوش

أثر ليهم، فين .؟

هارون

... جنابك معاك حق ، وليله كمان فين ؟

اللزي

... تقصدوا أيه ؟

هارون

فيه حاجات مش فاهمينها ؟ ودي وراها حاجات

كبيرة .

.....معناها أيه ، فهموني.

... معناها أنه فيه حد بيلعب من ورانا.

يلتفت لجعفر

... صح جنابك

...صح ياهارون

الذي

... حد مين الي يلعب من ورايا

انا حرق البلد باللي فيها.

جعفر

أنت قلبت البلد كلها وماوصلتش

لحاجة، أهل البلد بيخافوا ، لكن فيه

حد غريب بيلعب بيك وبيننا .

٢٦- حجرة لواحظ

ستظل المرأة النصف الجميل في الحياة سواء كانت
ظالمة أو مظلومة ، طيبة أم قاسية ، صادقة أم كاذبة
والبعض الآخر يقول المرأة هي كل الحياة وليس النصف
فقط لأنها من تلد وتُنجب النصف الآخر، عندما تسمو عاطفة
الحب لديها تُصبح حناناً وحنين ، هي جوهرة الطبيعة
الخالدة . بعثرت كل الأمنيات وأرسلتها للسماء وكتبت في كل أمنية أنت ثم أنت ولا أحد سواك يا حسن .
لواحظ امرأة ظلمتها الظروف ، منذ وفاة أمها ووهي
تقاسي ، تربت في حضان بيت قاسي لا يعرف
الرجمة ، هي الزهرة التي نمت وسط أشواك.
بمفردها في حجرتها ، تُحدث نفسها وكأنها بشخصيتين
لواحظ بنت العقل الباطن ولواحظ بنت الحياة.لواحظ الأنثى
ولواحظ التي تعيش بجسد ميت، لاترى سوى أشباح
حتى أتى حسن إلى القرية ، بدأت تتنفس بكلا رئتيها
بعد أن كانت في عدم.
.... وبعدين يالواحظ ، حتفضلي تفكري في
واحد مش حاسس بيبك .
حتعيشي في حلم .
مممكن يتحول لكابوس.
أنت غاويه تعذي نفسك،
.... طيب وأنا أعمل أيه ؟
أنا عايشه بين أربع حطان .

حتسكتري عليه أحلم .
... حتاخدي منه أیه أنت .
...مش عاوزه منه حاجه
كفايه أفكر فيه في خيالي.
.... غاوية تعب طول عمرك.
.... علشان كده اخترت أعيش في حلم.
كفايه انه منسيني همي
وواخدني وطاير ، طاير فوق ، بعيد.
.... يعني أنت شافيه نفسك مرتاحه كده.
...أيوه ، كفايه إني أشوفه بقلبي
وأمسك إيديه بإحساسي، أحضنه بشوقي.

٢٧- أمام المغارة.

حسن من هذا النوع من الرجال ، لطيف ولين
مع الناس ، هو يدرك أن الرفق واللين زينة الرجل
لا يُلقي مقالاً جارحاً ولو مازحاً، وجه بشوش
لا تفارقه الإبتسامه ، لا يتكبر ولا يستكبر
عن الصفح والإعتذار، لم يكن من هذا النوع
اللحوح اللجوج ، ثقیل الدم والظلال ،عديم الشعور
كثير المقال ، هو إنسان تجده في كل موقف
خدوم يدرك أن خدمة الإخوان من خير الفعال
حسن واقفاً مع مرسال امام المغارة .
... أنا حنزل البلد يامر سال .
... إزاي يا حسن ؟
... زي مانزلت أنت قبل كده .
... حتلبس بناعت ودع !
... ايوه وأدخل دار ارمنيوس .
... بس رجالة اللزي ، ماليين البلد.
أنت ماشفتش كانوا بيعاكسوني
إزاي ، كويس إن شكلي ماعجبهمش
لو كنت حلو شويه كنت إنكشفت .
حسن يضحك .
... ماتخفش أنا حنزل الصبح وأنت راقب
من بعيد .

... ربنا يستر ، هربنا من المر لقينا الأمر منه.

هو إحنا حفظنا نيله ليه، ومالقيناش غير البلد

دي نقعد فيها .

... وهو إحنا لقينا غيرها وماروحناش يامرسال.

... على رأيك بنرضى بالهم والهم مش بيرضى

بيننا .

٢٨- إمراة الودع

هل الحياة تستحق ..نحن نعشقها وقلبها بارد وجاف ...نعطيها ولن نحافظ عليها .نحدثها ولم ترد يوما علينا ...نجري خلفها
ولم يصلها أحد فيناثموت فيها ولن تبكي على أحد يوما ...فلماذا هذا السباق الفاشل نحوها

نحتاج أن نمر بسلام روحي في الدنيا حتى لا تتعثر خطواتنا في الآخرة

حسن تنكر في زي إمراة تضرب الودع، من كان

يمتهن تلك المهنة نوعية معينة يُقال عنهم

حلب ولا أحد يعلم منهم لماذا كلمة حلب ، يسير

في الدرب ويرى رجال اللزي مُبعثرين في كل

مكان .

... أضرب الودع وأبين زين .

.. وأشوف بخت الصبية فين

... تعالي يامليحه وشوشي الودع

... أشوفلك سكتك وأقولك ع الجدع

يقترب حسن من بكر وطلب رجلا اللزي

... أضرب الودع وأبين زين .

.. وأشوف بخت الصبية فين

... تعالي يامليحه وشوشي الودع

... أشوفلك سكتك وأقولك ع الجدع

بكر يستوقفه .

... إستني ياويليه أنت ؟

طلب معترضاً

.... ماإحنا شفنأها قبل كده يا حمار

دي وحشه وفقريه.

.... بس التانيه كانت قصيره شويه .

... الظاهر أنت إحوليت ، هي ، هي

نفس الخلقه .

يدخل هارون محدثاً طلب وبكر.

.... بتعملوا ايه هنا، عمالين تعاكسوا

الرايحه واللي جايه .

ينظر لحس الذي بدأ عليه التروتر

حاول أن يكون هادئاً.

غوري يا حليبه أنت.

حسن

... خلاص أنا ماشيه ، مش عاوز

انت ياراجل يا حليوه تشوف الودع

... ولا عاوز أشوف وشك يا حليبه

غوري من هنا .

... انا حليبه ، دنا الحسن نفسه.

... بقولك غوري من هنا .

يسير حسن عبر الدرب وهو ينادي بالودع

حتى وصل لدار ارمنيوس . يطرق الباب

تفتح يشعه .

... أيوه يا خاله .

... مش عاوزه تشوفي الودع يابنتي.

... ودع أیه یاخاله، مش عاوزه أشوف حاجه.

... أضربلك الودع زين واقولك حسن مستخبي

فین .

یشعه فی دهشه وتعجب

... حسن ، حسن مین ؟.

... انا حسن یایشعه .

یشعه تضحك

... حسن ، ادخل بسرعه.

یدخل حسن وتغلق یشعه الباب ويجلس

على أقرب دكة .

.... إزاي تخاطر بنفسك كده یاحسن .

صوت ارمنیوس من الداخل

.... مین یایشعه..؟

یشعه تقترب منه فی الداخل

....ده حسن یابا .

یخرج ارمنیوس من حجرته نحو حسن

...حسن ؟... إزیک یاحسن یاابني .

.... زی ماأنت شایف یاعمي .

.... یاابني نزولك فیہ خطر عليك.

... ربنا هو الحافظ یاعمي

یشعه

...أحضرلك لقمه تاكلها یاحسن...

... لا مفيش نفس ولا وقت
انتوا عاملين أيه وأخبار البلد أيه.
.... مفيش جديد ، أهل البلد قافلين
على نفسهم وجعفر واللزي ورجالتهم
طايحين في البلد، وسديري ربنا نجاه
من ضربة اللزي .
حسن وهو بين الدهشة والفرحة
... بتقولي ايه ؟ سديري ، سديري عايش.
ارمنيوس
... أيوه يابني ومستخبي في دار الشيخ آدم
حسن يتذكر ليله
.... يافرحتك ياليله .
...مسكينه البت دي مالهاش حظ.
... دي حالتها تصعب على الكافر ياعمي.
وأبوها وأخوها فين ياعمي.
... اللزي حرق بيهم الدار.
... انا شفت الحريقه من عند المغارة
وحسيت إنها في بيت الحمداني.
... لكن يابني مفيش أثر ليهم.
.... يعني ممكن يكونوا عايشين .
...أكيد يابني لو إتحرقوا كان عضمهم بان.
... يعني سديري صحته كويسه .

... أحسن كثير يابني والورم خف وبيقدر

يتحرك .

... أنا حهرب سديري للجبل ياعمي .

... حتهربه إزاي يابني ، رجالة اللزي

محاوطين البلد من كل حته، وبعدين

كده خطر عليك .

....ربنا يسترها إن شاء الله، بس

اوصفلي دار الشيخ آدم فين ، علشان

لما أنزل ، أنزل عليه طوالي.

... داره ماتتوهش ، أول الدرب ، البيت

الي قدامه الجميزة الكبيرة .

... كويس ، عرفته .

تدخل يشعه حامله صينية الشاي.

...الشاي يابا ، اتفضل ياحسن .

... كتر خيرك ياشعه ، مالوش لازمه

لازم امشي .

ارمنيوس

... وحتنزل إمتى تهرب سديري.

... لسه حفكر في طريقه ياعمي.

يشعه

....عفارم عليك ياحسن ، أنت ابن حلال

أنا حقولك تنزل امتي..؟

ارمنيوس معترضاً.

... وانت مالك ومال الكلام ده يايشعه .

... معلش يابا ، أنا سمعتكم غصب عني

وكمان خايفه على حسن .

... معلش ياعمي ، سيبها تتكلم.

....يوم الخميس الجاي ، النسوان والبنات

حيطلعوا الكوله عند الشيخه خضرة يغتسلوا

تقدر تنزل في اليوم ده.

ولما يطلعوا ع الجبل

اطلع معاها .

... صح كده يايشعه ، أنت وفرقي عليه وقت

كثير ، حقوم أمشي دلوقت.

حسن يقف مستعداً للمغادرة

ارمنيوس

... طيب كمل كوباية الشاي يابني.

... معلش ياعمي ، مفيش وقت.

يضع الطرحه على رأسه مغطياً بها

وجهه ويضع الغلق على رأسه ويخرج

٢٩- داخل المغارة

الوقت ليل ،عشاق الليل يتقاسمون به أشواق .

مختلفة ،فيهم من يتلذذ بساعاته الطوال ، وفيهم.

من يبكي وجعاً أو ذنباً وفيهم من يجد فيه ملهه

لنفسه،الوجع والشوق يهزان مضاجع النوم،

قلوب قليله التي تستفيق فيه لتطهر نفسها

في الليل يغسل الدمع بعض صفحات القلوب

ليه ومسعده داخل المغارة في ضوء خافت

تقترب مسعده من ليله .

... يابنتي كفايه حزن ، الحزن مش بيرجع

الي بيروح .

... الي راح عمره ماحيرجع ياخاله، معلش

أنا تقلت عليكم، وكمان منكده عيشتكم .

... ماتقوليش كده يابنتي ، انت نورتييني

كنت قاعده لوجدي زي قرد قطع،بحس

إنك بنتي وقلبي إرتاحلك .

.... وانتوا بقيتم كل أهلي ياخاله

ومش عارفه لولاكم ، كان حصلي أيه ؟

... ربنا كبير وهو الي بيدبر كل حاجه.

... معاي حق ياخاله .

... الي يعرف ربنا ويصبر ماينضممش

طول عمره .

.... وأنا صابره ياخاله ومفيش قدامي

غير الصبر، حسن إتأخر قوي ياخاله

هو كان لازم ينزل البلد.

... هو كده حسن ، لو صمم على حاجه

بيعملها مهما كانت صعبه.

... ربنا يحفظه ويرجع بالسلامه .

.

٣٠ خارج المغاره

الليل خارج المغارة بلون آخر، مرسل ورحان تتجافي عيونهم

عن النوم، أكفهما تجتمع إلحاحا في الدعاء، ألسنتهم تُتمتم

بالدعاء ، لا يخشون عواء الذئاب ولا صباح الثعالب

حتى ضغيب الأرانب البشرية لم يهتموا به، لو

كان الوقت نهائياً لطاردوا تلك الارانب .

... حسن اتأخر قوي يامرسل .

... ماتخفش عليه يابا ، حسن عفريت

محدث يعرف يمسه .

... الشر هنا كبير يابني وناسه ديايه

سعرانه مابترحمش .

... يابا ماتقلقش ، تلاقي المقدس عزم

عليه بالعشا هو وبناته أنت عارف ببسحوا

حسن أد أيه ، وهو ررح فيها شويه.

... ياريت الواحد كان بصحته..؟

....كنت عملت أيه يابا ؟

...ماكنتش سبتة ورجلي على رجليه

في كل حته .

مرسال يلح شبح حسن قادم.

... أهو جاي من هناك يابا ، شايفه.

... مش شايف حاجه يابني .

يقترّب منهم حسن ورحان يتهلل وجهه بالبشاشة

.... الحمد لله ، أهو وصل .

... مش بقولك يا با ، ده بسبع أرواح .

.... كده توغوشنا عليك يا حسن .

.. معلش ياعمي ، رجالة اللزي في كل
حته وماكنتش عارف أطلع ناحية الجبل
وألفت نظرهم.

... حمدالله بسلامتك.

... الله يسلمك عمي ، ليله عامله ايه.

...كويسه .

... بينا على جوه ، انا عندي ليها اخبار حلوه.

يدخل حسن لداخل المغارة ويتبعه رحان ومرسال
يلقي التحيه لمسعده

.... إزيك ياخاله .

... أهلاً حسن ، حمدالله بسلامتك.

حسن يتجه بنظره نحو ليله وهو بيتسم.

.. إزيك ياليله ؟

... أهلا حسن ، قلقنا عليك.

.... أنا جاييلك أخبار حلوه.

ليله بفرحه ودهشة.

.... أيه ، شفت أبويه ، وأخويه .

... أبوكي وأخوكي بخير ، سديري ياليله.

...سديري ليه بتجلب مواجعي.

.... سديري عايش ياليله .

تقف والدهشه والفضول على وجهها، تقترب من حسن

... انت واعي لى بتقوله يا حسن .

.... بقولك عايش وكمان صحته كويسه.

حالة هستيريا أصابت ليله

... أنت بتقول سديري عايش.

.... أيوه ومستخبي عند الشيخ آدم.

إفتربت بتلقائية نحو حسن وحضنته

... أنت بتتكلم جد مش كده ،مابتضحكش

عليه صح .

... أيوه ياليله وحضحك عليك ليه..؟

تصرخ ليله وهي تحتضن حسن

مرة أخرى .

... يعني سديري عايش ، ربنا يخليك

تشعر بخجل من إحتضانها لحسن

... أنا أسفه يا حسن ، غصب عني.

مسعده

.....حسن زي أخوي ، مافيهاش حاجه

تنظر ليله لحسن.

... حسن أحسن اخ في الدنيا ياخاله

يمكن في غلاوة حمدان واكثر.

تعود وتسأل حسن

.... معرفتش حاجه عن أبويه وأخويه.

.... إستني عليه أرتاح ياليله واخذ نفسي.

رحان

.... اقعد يا حسن إرتاح ، يومك كان طويل وصعب.

يجلس حسن ويرتاح قليلاً.

...أبوكي وأخوكي أكيد عايشين ياليله.

... يعني أنت شايف كده .

.... أيوه لم طففت النار مالمقوش ليهم أثر

في البيت .

... وتفتكر حيروحو فين.

.... تلاقيهم مستخبيين في أي حته

في غيط ولا الجبل ، الله أعلم بيهم فين

بس الأكيد عايشين .علشان اللزي ورجاله

بيدوروا عليهم ، لو اتخلصوا منهم ، مش

حيدوروا عليهم.

رحان يلتفت نحو ليله .

... شوفتي ربنا كبير إزاي ياليله ، أهو قلب

حالنا من حزن لفرح .

يلتفت نحو حسن .

....عاوز أقولك حاجه يا حسن يابني.

.... قول ياعمي ، يمكن تكون

حاسس باللي جوايا.

.....أنا حاسس بيك يا بني ،أنا جيت بيك
علشان أبعدك عن الشر، وهربت بيك
بعيد ، هربت لحضن الجبل ، كل مأبعدك
عن المشاكل خوف عليك، تتحط في مشاكل
أكثر، لكن الظاهر يا بني، الظروف والمشاكل
أقوى مني ومنك وانت مش حتسكت .
.... الظلم وحش ياعمي ومش بطيقه
حاجات جوايه فوق طاقتي بتحركني.
.... علشان كده لازم بيقالك عزوة كبيرة
..... انتوا عزوتي ياعمي.
... إحنا مش كفايه،أنت بأفعالك دي
حتكسب قلوب الناس الغلابه والمظلومين
كون منهم عزوتك ، علشان تقدر تقف
قدام جعفر والليزي .إكسب الناس الغلابه
اللي نفسهم يلاقوا راجل واقف للزي .
.... انت عاوزني أقابل الليزي وأحطب معاه.
..... مافيش قدامك غير كده ،وما تفرقش كثير.
.... إذا أنت مارحتش للزي ، بكره حيعرف أنك
موجود وماسبتش البلد وحيدور عليك وحيجيلك.
..... معاك حق ياعمي ،وكل شئ بأوانه .
أنا حنزل البلد يوم الخميس ، علشان
أهرب سديري وأجيبه هنا .

ليله بفرحه

... صحيح يا حسن .

تراجع ونُظهر قلقها على حسن.

..... حسن انا بصحيح خايفه على سديري

ونفسي أشوفه ، لكن خايفه عليك أنت كمان.

.... متخافيش عليه ياليله ، أنا مخطط لكل حاجه.

وحجيبك جوزك.

ليله تبكي بحرقة

.... ربنا يحرصك يا حسن .

٣١- مضية جعفر

هُم من ذلك النوع الذي يقيس القوة بالقسوة
والرجولة بالغلظة والخشونة، قلوبهم إكتظت
زواياها بالخُبث والريبة ، هُم من يقيس الحياة
بالمصلحة ، قلوبهم لا تعرف الرحمة ، إن حضنوك
غدروا بك وطعنوك في ظهرك، هم يقيسون السعادة
بقبح وجوههم، بضحكات ساخرة وإبتسامات مابين
شماته وريبة ، قلوبهم تعفنت ، تربوا على كتم الأنفاس
وقتل الإحساس.

داخل مضية جعفر ، لواظ تحاول مع ابياها حتى
يوافق على خروجها يوم الخميس مع نساء القرية
... أنا خرج بكره مع حليمه.

....تخرجي فين ...؟

...أروح معاها وأتفرج على النسوان وهما

طالعين الكولة يغتسلوا هناك ويغنوا .

.... نسوان أيه اللي تخرجي معاها؟

وأنت مالك ومال النسوان دي.

....عاوزه أشوفهم يابا ، نفسي أشوفهم

... يعني حتشوفي الخيله، الناس دول

مش من مقامك .

يدخل اللزي وخلفه اخته منيره.

الزّي

.... إزيكم ، عاملين أيه.

جعفر

... أهلاً يالزي، أهلاً بيك ياست منيره.

منيره

... أهلاً بيك أنت ياسي جعفر.

لوا حظ تواصل مع جعفر محاولتها

...والنبي يابا ، خليني أروح معاها.

.... مش حتروحي يالوا حظ.

منيره للوا حظ.

.... فيه أيه يالوا حظ..؟

لوا حظ بقرف من منيرة ، فهي تدرك أنها تأتي

لتنسج شباكها حول أبيها .

... مفيش حاجه

جعفر

.... ماتقوليلها فيه أيه..؟

يلتفت للوا حظ

... إسمعي ياست منيره ، لوا حظ

عاوزه تطلع الكوله مع النسوان

بكره ليلة الخميس .

منيره بثقه وغرور هامسه لوا حظ

... أكلمه أخليه يوديكي معاها..؟

.... لو منك مش عاوزه خروج.

... أنت حره ، وزي ماتحبي

أنا كنت قاصده خير .

لوا حظ وهي مترددة ونادمة على رفض

تدخل منيره ، فتحدثها في لين

..... وتفتكري لو كلمتيه حيوافق!!

.... دلوقت تشوفي.

تلتفت منيره ناحية جعفر

...ماتسيبها ياسي جعفر تروح

معاهم ، خليها تُفك عن نفسها

شويه من الحبسه اللي هنا.

.... تروح فين بس ، تروح مع الحوش دول ؟

اللي يقف مندهشاً

.... تروح فين ، وتعمل أيه معاهم ؟

منيره معترضة اللي وببدال

..... علشان خاطري أنا ، المره دي وبس.

.... ماشي ، علشان خاطرك أنت يامنيره

بس المره دي وماتطلبش تاني.

.... حاضر يابا

محدثه منيره

.... بينا يامنيره على اوضتي فوق.

جعفر للزي .

.... أنا كنت عاوزك ونسيت عاوزك في أيه ؟

... عاوز تظمن على محصول الجنائين ، بعناه

كله .

..... لا ، مش ده اللي كنت عاوز فيه.

٣٢- حجرة لواظ

عندما تتحول الإنسانية إلى جثة داخل محرقة

تخرج بوجه مشوه، وجسد محروق وتعيش بعجز

كامل ، هؤلاء الأشرار يقومون بالتضحية بالغلابة

والمساكين ويقدمونهم قرابين لآلهة الشر

من يقتل الإنسانية هؤلاء الذين يصلون من أجل

المال لا من أجل النور، عشقوا ليل المدينة

وضلوا عن نهار السماء.

لواظ بصحبة منيرة في حجرتها.

.... لواظ أنا كلمت أبوك ووافق، لكن مش

فاهمه ليه عاوزه تطلعي مع النسوان دي

مش عاجبني إنك تطلعي معاهم

.... عاوزه بس أفك عن نفسي شوية

زهقت من البيت والجنيه.

....لو زهقانه أنا أجيلك كل يوم.

وأخليكي ماتزهقيش.

لواظ تحدث نفسك

.....أيوه ، انت نفسك تيجي علشان

أبويه وكمات تكتمي على نفسي

أنا عارفه أنت عاوزه ايه كويس يامنيره.

منيره

.... لواحظ ، لواحظ، أنت دماغك راحت فين

.... مفيش يامنيره ، أيه مفيش أخبار عن

حسن .

.... أهو غار وهج من البلد وإرتحنا منه

... بس أموت وأعرف جتته سديري

راحت فين .

.... أنت بتتشفي في جتته ميت يامنيره

....هو الي عيشني فيه شويه.

.... عيشك في أيه وقارشه ملحته ليه

منيره تسرح بخيالها محدثة نفسها

.... ياريت عارفه أكرهه ، أنا عاوزة

قلبي يرتاح من العذاب وبس

موته أحسن من عذابي وأنا بفكر

فيه وهو في حضن ليله .

منيرة ضاجعت حلم بعيد أثمر عن حمل كاذب

هي تبحث عن مطرقة لتفتت صخرة الوجع

ولو بإنتقام.

لواحظ تأكدت أن ما قيل لها عن حب منيره

لسديري حقيقي.

....منيره ، أنت رحتي فين .

... مفيش يالواحظ.

... أنت بتجبي سديري صح.

وجهها يحمر ويظهر عليها التوتر .

.... احب مين .. أنا أحب ابن بتاع الطعميه.

٣٣_ مضيقة جعفر

ما الحياة إلا إختبار من نار، لا يجتازه إلا القليل، ولك الخيار بين جنة، وجحيم.. فمن يمكنه النجاح في إختبار النار، نعيش موقى بلا رثاء ، تهرب من بين أقدامنا الأيام.. الوحوش تتربص بنا وتحيط بنا من كل جانب ... نظام بلا مبادئ لن يحمي الضعفاء والفقراء والمساكين.

في مدن اللهفة تتعالى الصرخات.
قلوب مشردة.
لم تجد مساكن إيواء
تجمدت الدماء من صقيع الرغبة
يجمعون كل الأحطاب
عجزوا أن يجدوا عود ثقاب
من داخل مطبخ ابليس ، جعفر واللزي .
...إسمع يالزي ، أنت مش حصدت القمح كله.
.... ايوه ، والنوارج حيدرسوه بكره وبعدها
يشغلوا الدراوه فيه .
.... قبل ماتشون الغلة في الصوامع
الي يعوز غله من أهل البلد اديه
الي عاوز كيله أو اتنين أو تلاته
إديهم واللي عاوز أردب كمان
..... البلد كلها مفيهاش قمح وخوايبهم
شح فيها الدقيق.
.... أنا عارف ، علشان كده ، عاوزك
تغرقهم، ادي كل واحد خزين سنه.
.... بس كده حيطمعوا فينا .

... لا يافالح مأنّت حتبصمهم على تّمن
الغلة وخلي البلد كلها مداينه لينّا، إحنا
كده بنفرحهم شويه، وبنخنقهم في نفس
الوقت .

.... أقطع درايعي لو فاهم حاجه.
... علشان دماغك واقفه ومابتشتغلش.
إعمل الي بقولك عليه وبس .
..... خلاص زي مأنّت عاوز حعمل
لو عاوز تفرقلهم الغله كلها حديها ليهم.
.... الي حيطلع ليهم مش كثير زي
مأنت فاكر ، وكمان يابجم حيطحنوا
غلثهم فين ، عندنا في الطاحونه
ووقتها نزود ليهم تّمن الطحين شويه.

٣٤- في الدرب

الظالم هو مرء يحيا على حرمان غيره من الحياة
يحجب عنه الضوء ليعيش في ظله، مقاومة الظلم
ضرورة ليس لأننا نخشى إرتكابه ، بل نخشى أن
نعاني منه، يجب أن يتذكر من يواجه الظلم أنه
الأقوى لأن قضيته عادلة فهو يواجه من يسلب
منه الحياة ويطعن أحلامه .

تنكر حسن في زي امرأة ، يسير في الدرب
باتجاه منزل الشيخ آدم ، هو يدرك أن أفضل أنواع
الانتقام هو الانتقام من الطغاة ويدرك أن من تعود
على الظلم ، لا يدرك طريق العدل، أحد رجال
اللزي يقطع الطريق على حسن .

.... رايحه فين ياويله .

حسن بصوت ناعم

... رايحه للشيخ آدم.

.... رايحه تعملي أيه عند الشيخ آدم.

.....رايحه يعملي عمل ، العقارب ياخويه

ملت الدار، والشيخ آدم احسن واحد

يعمل عديه للعقارب وسره باتع.

..... طيب وريني وشك .

.... أوريك وشي إزاي ، إخص عليك

راجل بعين فارغه، أنت حتسبني
في حالي ولا أرقع بالصوت وألم أهل
البلد، وأخلي اللي مايشترى يتفرج.
.... لا على أيه ، غوري في داهيه
وأنت مره صوتك يقطع الخميرة من البيت.
.يواصل حسن سيره حتى يصل إلى الجميزه
هاهي دار الشيخ آدم ونجح في الوصول إليها
يطرق الباب وهو يلتفت يميناً ويساراً، لحظات
وتفتتح عزيزه .
.... مين أنتي .
.... أنا ضيفه جايه للشيخ آدم يعمل
عدية ياسين للعقارب .دخليني أنت بس
. يدخل حسن ويغلق خلفه الباب وعزيزه
في توتر وريبه.
صوت الشيخ آدم
....مين ياعزيزه ؟
... دي واحده غريبه ماعرفهاش بتقول
عاوزاك .
..... أهلاً بيها ، اتفضلي ياست.
يتجه حسن نحو الشيخ ادم.
حسن بصوته الرجالي
.... السلام عليكم

عزيزة في دهشة وتوتر.

الشيخ ادم

... ده صوت راجل ، مش واحده ست.

حسن يخلع الطرحه

.... أنا حسن يامولانا.

.... حسن ، حسن مين يابني.

.... انا جاي من الجبل علشان أهرب

سديري للجبل.

.... ومين أدراك أن سديري عندي ؟

.... المقدس ارمنيوس قلي على كل حاجه

.... تبقى أنت حسن الي ضرب كريم

والي أنقذ ارمنيوس من الهلاك .

.... ربنا هو الي بيعين يامولانا

أنا سبب بس .

.... ونعمه بالله يابني، كم تمنيت

أن القاك واشد على زندك، قرب

مني يا حسن.

حسن يقترب من الشيخ ادم ويجلس بجواره

والشيخ ادم يتحسس ملامحه وذراعه.

... بارك الله فيك يابني

محدثاً عزيزه .

... إنجري يا وليه ، حضري لقمه لحسن.

... مفيش داعي يامولانا .

محدثاً عزيزه

.... طيب هاتي شوية بلح ياعزيزه

... فين سديري يامولانا ؟.

... في أمان يا ابني ، أنا أخفيتك لما طرقت

الباب افتكرت حد من رجال اللي مايتسموا

يدخل سديري.

حسن

..... إزيك ياسديري .

يرد سديري بتوتر وترقب

.... اهلاً.

الشيخ ادم محاولاً إزالة توتر سديري.

.....ده حسن ياسديري اللي ضرب كريم

وضرب مهران وأنت شلتك على بيت المقدس.

سديري يقترب من حسن ويحتضنه

.... كويس انك بخير يا حسن ، إحنا قولنا

طفشت ولا هجيت ؟

.... الحمد لله وكويس إنك إنت كمان

بخير بعد اللي حصل.

... لابس كده ليه يا حسن .

... أنت عاوزني أجيلكم بحالي

.... معاك حق .

... انا جاي علشان أهربك ياسديري

للجبل عندي .وليك كمان عندي هديه

هناك .

.... هدية ، هدية أية يا حسن؟

.... ليله عندي ياسديري.

... ليله عندك ..؟ أنت بتقول أية ؟

وبتعمل أية عندك؟

.... أنا هربت ليله يوم ما كنت بتحطب

مع اللزي وهي في أمان وماتخفش.

.... كأنك كنت حاسس بكل اللي حي جرى.

.... أيوه ياسديري وهي في أمان مع أخوك حسن.

سديري يحتضن حسن والدموع تنهمر من عينيه

... اللي زيك يتأمن على روحه يا حسن .

.... إحنا إخوه ياسديري ، إسمعني مفيش

عندنا وقت أنت حتلبس شبهي كده وحنخرج

مع النسوان اللي طالعه الكوله ، وعلشان

تشوف ليله ياسيدي .

الشيخ ادم

... والله كرهتوني في الليل بليلتكم دي

الي قلبت حال البلد .سديري غاوي وجع قلب.

سديري

... ليه يامولانا ، العشق حلو ، ليله

فين وانا فين ومابتغيش عن بالي ، زي

العطشان والوزير جنبه ومش قادر يشرب منه.

الشيخ ادم

... لا ، كلامك ده قاله شاعر جاهلي

قبل منك .

حسن

... والشاعر قال أيه يامولانا.

... الشاعر قال

.... وأمر مالقيت من جرم الهوى

.... قرب الحبيب وما إليه وصولي

.... كالعير في البيداء يقتلها الظمأ

..... والماء فوق ظهورها محمولي

حسن

.... الله ، الله على الكلام الحلو

فكرتني بالشيخ عامر.

الشيخ ادم

...أنت تعرف الشيخ عامر.

.... أيوه أعرفه وأنت تعرفه ياشيخ أدم.

... طبعاً يابني ومين مايعرفش الشيخ

عامر ، أنا اتعلمت في كتابه ، ولكن

انت تعرفه منين.

حسن لسديري

.....قوم شوفلك جلييه وطرحه عند

الخاله عزيزه .

الشيخ ادم

... قوم وخلي عزيزه تديك اللي عاوزه.

يدخل سديري الى الداخل حيث توجد عزيزه.

الشيخ ادم

....لم تجب عن سؤالي يا حسن

تعرف الشيخ عامر منين .

... انا قصدت يامولانا ما حبيتش أتكلم

قدام سديري ولا عاوز حد يعرف اللي

حقوله ليك.

... قول يابني سرك في بير، انت تقرب

للشيخ عامر..؟

....الشيخ عامر يبقى أبويه.

... ماذا تقول يابني اتهازأ بي.

... دي الحقيقة يامولانا ، أنا هربت

بعد مانفذوا حكم الإعدام في أبويه

وقص حسن ما حدث للشيخ عامر

في الأحداث الأخيرة .

... يعني أنت تبقى ابن الشيخ عامر

... أيوه يامولانا وإبنه الوحيد.

... ياه الدنيا ضيقه ، كل اللي بتعمله

هنا ريحة الشيخ عامر ، أنت راجل

من ظهر راجل ، تعالى في حضني

ياحسن .

الشيخ آدم يحتضن حسن ودموعه تتساقط بغزاره.

... وانت قاعد فين دلوقت ياابني؟

... في مغاره في الجبل .

... من اليوم داري مفتوحه ليك ياحسن

والبيت ده اعتبره بيتك.

... كتر خيرك يامولانا

يدخل سديري مرتديا ملابس عزيزه وواضعاً

طرحه على وجهه ، وحسن يبتسم.

....أيه رأيك كده ياحسن .

حسن يضحك

... بقينا شبه بعض .بينا نلحقوا الحریم.

حسن للشيخ ادم

... قولي يامولانا ، النسوان بيتقابلوا

فين قبل ما يطلعوا الكوله .

... عند دار ارمنيوس ، معاك سديري

هو عارف كل حاجه .

يخرج حسن وبصحبه سديري ويتابعان

سيرهما في الدرب ويقطع طريقهما نفس

الرجل الذي قطع الطريق على حسن ، ممسكاً بعود قصب.

لحسن

.... وبعدين ، أنت مش كنت لوك يا وليه.

... أيوه ما اختي كانت جوه وسبقتني .

....واختك كانت بتعمل أيه جوه ، أنا

ماشفتهاش داخله .

... علشان أنت قاعد تمص قصب

ومش واخذ بالك.

الرجل محدثاً سديري

... وانت كمان كنت بتعملي أيه جوه

بتعملي عمل انت كمان .

حسن مقاطعاً

.... عندها جوزها شبهك كده، راحت

تعمله عمل علشان تخلص منه.

الرجل بغضب

... ياساتر يارب ، والله لولا الملامه لاقتلكم

انتوا الإتنين ياعرة النسوان .

حسن بخفة دم معترضاً على كلامه.

...إحنا عرة النسوان يامعفن ياغبان

إحنا نسوان جدعه قوي ، تحب نوريك.

... لا على أيه، لاتوروني ولا أوريكم

غورروا ربنا يرزقكم بديب يكون جعان ياكلكم

ويريح جوازكم منكم .

٣٥- أمام دار أرمنيوس

إن كنت تحب أن ترى بعيون ثلاثة فاكتب على جبينك قصيدة الأمل، الحياة مليئة بالحجارة فلا يجب أن نتعثر
بها بل نجمعها حجرة فوق حجر وتبني بها سلم نصعد به نحو

القمة. لاتكن مثل هؤلاء الذين ينادون على الأحياء بلا صوت

فيجيهم الأموات .

لواظ وحليمه أمام دار ارمنيوس ،تطرق حليمه الباب

فتفتح لها يشعه وخلفها مريم .

حليمه

... كويس انك لابسه وجاهزه يايشعه .

... أنا جاهزه من بدري ، مين اللي معاك دي؟

.... دي الست لواظ.

... الست لواظ ! ، مش معقول اتفضلوا

بيتكم ومطرحكم.

تدخل لواظ بصحبة حليمه ، يشعه تعرف

لواظ مريم اختها .

.... دي تبقى مريم اختي .

... إزيك يا مريم .

.... خطوه عزيزه ، أنا مش مصدقه نفسي

انك هنا .

... مش مش مصدقه ليه .

إحنا كلنا ولاد تسعه

مريم

.....لا انتوا بقى ولاد سبعة.

لوا حظ تضحك من دعاة مريم

....دمك خفيف يا مريم.

... خفيف ولا ثقيل .

حيهمك في ايه.

يشعه ضايقها اسلوب مريم مع لوا حظ، وتنظر

لمريم نظرة اعتراض.

....ماتزعلش منها ياست لوا حظ ، بتهزر

معاك ، اصلها مش مصدقه انك هنا.

حليمه

... انتوا حتفضلوا تحكوا كتير، النسوان

ملمومه بره ويكن يتحركوا .

٣٦- في الجبل

لا تتعجب إن وجدت الفضيلة عارية في الشوارع والريزلة هي

المحتشمة فالثعالب هي التي تؤذن والذئاب تقيم الصلاة

والحمار يسطر التاريخ والجمل يقرأ الكف.

نعلم دائماً نقطة البداية ولا نبصر خط النهاية ولذلك نتعثر دائماً في خطواتنا

..

النساء يحملن المشاعل في أيديهن

وفوق رأس كلاً منهن صفيحة ماء ساخن

أو بلاص ، حسن وسديري يسيران

خلفهما ويحمل كلاً منهم صفيحة .

حديث هامس بين إمرأتين وحسن

وسديري ينصتان لهما .

المرأة ١

...أنت لسه ربنا ماعوش عليك بالخلفه.

المرأة ٢

.... ايوه لسه، ماخلتش ياختي ولي إلا

وزورته وزورت كل المشايخ ، لحد ماولاد

الحلال قالولي روعي زوري الشيخه خضره

واقهرمغي شويه عند السياف .

المرأة ١

... أيوه تتمرمغي عند السياف سبع

مرات ، مش حيعدي شهر عليك
إلا وتكوني حبله .
حسن يبتسم ويهمس لسديري.
... والنبي نسوانكم مجانين ، تتمرمغ
أيه سبع مرات.
....دي عاده من زمان كل النسوان
بيعملوها ، أنا شفت أمي وجدتي
بيعملوها .
... ومش خافين من الديابه.
... الديابه مابتطلعش لكتره من الناس.
النساء يتابعن السير في إتجاه الكوله
والكوله هي تبه مرتفعة لا يتعدي ارتفاعها
العشرين متر وفوقها مقام بالأحجار يدعونه مقام الشيخه
خضرة ، حسن يبحث عن يشعه ويسير خلفه سديري
مندھشاً من تصرفه كأنه يبحث عن أحد ما
، وصل حسن الى يشعه التي تسير
بصحبة ثلاثة نساء يعرف منهم مريم فقط. يبطء
السير خلفهم مباشرة وينصت لهن.
يشعه لحليمه
.... أيه اللي خلاي تجيبها معانا .
.... لواظ كويسه وعاوزه اقولك حاجه

أكيد محدش هرب حسن من بيت أبوها

غيرها ، وبتحب سيرة حسن.

.... عاوزه تقولي إنها بتعشق حسن ؟

.... وماتعشقوش ليه ، كل بنات البلد بيعشقوه

حسن يتابع الحديث وتأكد أن المرأة التي يتحدثان

عنها هي لوحظ التي انقذته وسمع صوتها ولم

يراهها ولم تكشف حتى عن شخصيتها له، يالعجائب

القدر ، هي بجواره ولن يستطيع أن يكشف لها عن

نفسه ولن ترى سوى عينيه ولن يرى سوى عينيها

يالقسوة الأيام ، حلیمه أحست بدس حسن نفسه

بينهن .

.... أيه ياويله انت ؟ عماله تدفسي نفسك

وسطينا ليه .

يشعه

.... فيه ايه يا حلیمه؟

... الوليه دي عمله تدفس نفسها وسطينا.

تلتفت يشعه نحو حسن فيحدثها هامساً

...انا حسن يايشعه.

يشعه تنظر الى المرأة التي بجوارحسن

وتدرك أنه سديري وتبتسم .يشعه تحاول

أن تتمالك نفسها من تلك المفاجأة التي هزتها

حلیمه ليشعه.

.... أنت تعرفي الوليه دي يايشعه ؟

يشعه تتلعثم وتتردد في الرد.

....آه أعرفها ، دي من عرب بني واصل.

.... أنا اول مره أشوفها.

لواحظ

... فيه أيه ؟ انا مش فاهمه بتوشوشوا

بعض في ايه.

يشعه للواحظ

... عاوزه تعرفي أخبار حسن .

.... أيوه ، فيه أخبار عنه؟

تشير يشعه على حسن.

... الست دي تعرفه ، أصله هج وطفش

من هنا عندهم.

... صحيح الكلام ده ؟

...أيوه.

لواحظ تنظر إلى المرأة هي لاتعرف أن من تبحث

عنه هو قريب منها.

هي المعلقة بين شقوق السماء

هي من تظل تحلم به.

قد يهبط يوماً...تنتظر علامة القدر

تقف في مدن الإنتظار

قد تأتي بها الريح

وقد تقذف بها الأقدار

لواظظ لحسن .

... صحیح یاخاله تعرفی حسن ؟

.....وَأنت بتسألني عن حسن ليه يابنتي؟

... مش عارفه أقولك أيه ياخاله، أقولك أني

مش لاقيه حاجه أعملها إلا اني أفكر فيه .

... وَأنت تعرفي عنه أيه .

... سمعت عنه،حتى لما كان نفسي أشوفه.

كان الوقت ليل ، كان قدام عيني ومش شايفاه

.... كان قدامك فين يابنتي.؟

... في بيت أبويه .

.... أبوي ...! أبوي مين ..؟

.... الملتزم جعفر ياخاله.

... انت بنت جعفر !

....أيوه ..

... خساره .

... خساره ليه ياخاله.

.... خسارة ان ورده زيك تطلع من شوك جعفر.

همليني ، انا مش عاوزه مشاكل .

عندما وصل النساء عند الكولة انسحب حسن

ومعه سديري بعيداً.

لواظظ اندهشت من موقف المرأة وإختفاءها فجأة

بعدها علمت أنها بنت جعفر.
لوا حظ ليشعه .
.. مالها الست دي ، اتعفرت فجأة وسابتنا
ومشيت ليه ..؟ يمكن علشان عرفت
أني بنت جعفر !
.... يبقى علشان كده مشيت .
لوا حظ تندب حظها .
.... يا بختك لاسود يا لوا حظ ، يعني
كان لازم أقولها أني بنت جعفر.
.... مالك يا لوا حظ ..؟
.... مالحقتش أعرف منها حاجه عن حسن.
... دي باين عليها الحكايه جد، أنت بتعشقي
حسن يا لوا حظ.
..... مش يايدي يايشعه .
.... وإزاي تعشقيه من بعيد كده.
.... شايفه فيه حلم جميل، حبيت
أعيش فيه .شايفه فيه الراجل الي
ممکن يكسر سجنى.
.... أنت مش سعيدة يا لوا حظ، معقوله بنت
جعفر بتقول الكلام ده .
...بنت جعفر؟ ، بنت جعفر؟ ليه بتبصولي
على أني بنت جعفر وبس ، انا بني آدمه

زيكم وليه قلب زيكم .

أبويه دفني بالحياه

يايشعه ، أبويه جبل محاوط رقبتني وبيخنقني.

لواظ تبكي ويشعه تشفق لحالها.

.... أنت بتعيطي يالواظ، يابخت حسن

بالحب ده .

..... حسن ! هو فين حسن يايشعه؟

حسن راح خلاص .

.... حسن موجود يالواظ وكان بيتكلم معاك

من شويه .

لواظ تهزها المفاجأة .

.... كان موجود ! وبيتكلم معاه ! انت

بتقولي ايه ؟

.... حسن هو الست الي كانت بتتكلم

معاه دلوقت ومش عشان كان معاه

سديري بيهربه .

.... يعني حسن هو..؟

لواظ يغمى عليها ويشعه ومريم وحليمه

يحاولون إفاقتها .

حليمه

.... ست لواظ ، ست لواظ .

٣٧- بالقرب من المغارة

ليس كل حماة المستقبل شجعان فالكثير منهم جبناء،أصدق القصص هي التي نراها، فمعظم الحكي كذب ،فمدن الأمل والسعادة مباح إستعمارها لمن يملك قوة الإرادة، في غياب شرطة المنام لا تزال الكوابيس تطارد الأحلام...الغول يقف على ناصية الحلم ساخرا،أنهم يحاولون ذبح الأسود وينحرون الذئاب ويجلدون النمر ويسمنون الحمير ويمنحون الثعالب الرفاهية والبومة تبتسم وتغني فليحيا الغراب.

... بالقرب من المغارة نزع كلا من حسن وسديري

ملابسه .

... مش عارف أقولك أيه يا حسن .

... ماتقولش حاجه ياسديري ، وهم معايه

تلاقي ليله قاعده على نار .

... جميلك ده في رقبتى

وفوق راسي طول العمر.

انت خاطرت بنفسك مرتين

مره علشان ليله ، ومرة علشاني.

.... مالوش لازمة الكلام ده .

يقتربون من المغارة ، مرسال ورحان يستقبلونهما

في ترحاب وفرحة وكانت الفرحة الكبرى لليلة

التي لم تصدق نفسها وأن سديري أمامها فاحتضنته

بقوة وبكاء أثار شفقة من حولهم رحان وزوجته مسعده

ومرسال وحسن .

٣٨- امام قصر جعفر

لواظ التي كانت تسافر في حلم عبر الزمن
وكانت تقف في محطة الإنتظار ، هاهي تتحسس
الأمل بيديها وبقلبها .

في مدونة العشق..باب الذكرى ،.كتبت قصتها بالحبر السري حتى لا يفك شفرتها سواه وتركت معه الشفرة.

يشعه وحليمه يسندان لواظ التي في حالة ذهول
وتعب وتهذي .

..... أنا شفت عنين حسن ياشعه.

.... أبوس إيدك إنسي حسن لوقي

بلاش سيرته إن كنت بتحبيه .

يشعه لحليمه.

...إحنا قربنا من دار جعفر ، أنا

حمشي يا حليمه وأنت ماتسيبهاش

وطليعيها أوضتها .

حليمه تصل لدار جعفر وتطلب من الحارس

مساعدتها ويدخلان بها القصر فينزعج

جعفر ومعه اللزي وهارون .

جعفر

... فيه أيه ؟ ..مالها لواظ.

حليمه

... بعافيه شوية.

تصعد بها حجرتها وتساعدها حتى

السريير.

....حسن ، حسن .

... أنت اللي حتودي حسن في داهية

بلاش ياست لواظ سيرته

أنا إترعبت قدام أبوكي وخفت

تجيبني سيرته.

٣٩- في الحقول

مع بشاعة واقع مر ومع القهر تسمع عويل النساء

وبكاء الأطفال وصراخ الرجال ، أسوار البلدة مهزومة

فالخيانة تفتح أبواب الخسة والوضاعة ويستحيل عليها فتح أبواب الشرف، قصيدة عصر شديدة المرارة .. خلت من الحكمة
..حروفها تلونت بالدم ،فأسوأ مظاهر الإنسانية أن تصبح قطيع للذئاب....

السلوتي راكباً حمار ،يسير في طريق ضيق

عبر الحقول ،يقف به الحمار فجأة .

السلوتي غاضباً من حماره.

... انتي كل شويه تقفي، وربنا

أسيبك للديابه تاكلك.

ينزل السلوتي من على حماره.

.... خليكي واقفه هنا يا حماره

يابنت الحمار، أوعي تتحري

أوعي تتحري من هنا

حدور على شوية ملوخية وأجي.

يسمع صوتاً بالقرب منه

.... أيه ده ياواد ياسلوتي ،هو فيه

حد معايه .

يلتفت حوله .

... لا مفيش ،يبقى عفريت

لا أنا أرجع لحمارتي ولا أقولك ياواد

أروح أتفرج ع العفريت.

يقترب السلوتي من مصدر الصوت ، هو يعرف

صاحب هذا الصوت.

صوت الحمداني

.....أنا زهقت يا حمدان يا بني من القعدة دي.

.... احسن من قعدة الجبل يابا.

يقترب منهم السلوتي فيجد الحمداني وإبنة حمدان

الحمداني

... أنا حنزل البلد واللي يحصل يحصل،

مش حشوف أكثر من اللي شفته.

.... نصبروا شويه يابا .

السلوتي يقترب منهم ويجلس بجانبهم دون أن

يشعروا به وفجأة يُرهبهم بمفاجأته.

.... إزيكم .

الحمداني وحمدان ينتابهما الرعب والسلوتي

يطمئنهم .

...متخافوش أنا السلوتي .

حمدان

.... يخرّب مطنك ياسلوتي وقعت قلبي.

الحمداني

... إزيك ياسلوتي وعامل أيه.

.... أنا كويس ومعايه حماره.

.... ماتعرفش حاجه عن ليله بنتي.

.... عارف كل حاجه.

حمدان يمسك به

.... عارف أيه قول.

.... إهدا يا حمدان يا ولدي ، خلينا نفهم

الحمداني للسلوتي

.... تعرف أيه عنها يا بني.

... خطفها السبع وطار .

.... سبع مين يا بني.

... بتاع الفلايات ، خطف ليله في شوال.

.... بتاع الفلايات مين ؟

... بتاع الفلايات خطفها قبل ما يضرب

اللزّي سديري .

حمدان

.....تفتكر حد يكون خطف ليله يا بابا! ،

وحيخطفها ليه.؟

... خلينا نفهم من السلوتي.

... أنت تعرف بتاع الفلايات .

... أيوه ، أعرفه وعایش معايه.

.... مين ده يا سلوتي وجعت قلبي.

.... حسن الي ضرب كريم وقتل مهران.

الحمداني

وهو حسن لسه قاعد ، أنا سمعت أنه هج

من البلد .

السلوتي

حسن ماهجش وأنا لقيته واقع

ماينطقش جنب بيت جعفر

أخدتة مغارة التعابين عندي.

حمدان

..... ويخطف ليله ليه ؟

الحمداني

....أنا فهمت يابني ، حسن مش ممكن حيخطفها.

حسن هرب ليله من اللزي ، صح ياسلوتي.

.... أيوه صح .

.... الحمد لله ، دلوقت إطمئنت.

يلتفت نجو السلوتي

.... تقدر تاخذنا هناك

.... ايوه ، بس محدش يعرف حاجه

المقدس اداني حماره علشان مااجبش

سيرة حسن .

٤٠- دار اللزي

من أي سلالة هم ، تيار من الشر يتدفق ، الأبصار
معلقة على الريح ، ففي سوق النخاسة الإنسانية
بلا ثمن ، ليس من الصعب أن نفتش عن النوارس
والعصافير واليمام ، في فضاء تخترقه أسراب البوم
والغربان .

اللزي ومنيرة شخصيتان متشابهتان إلى حد كبير
حتى في العشق ، عشقهم مُظلم ، مُكبل بالأنانية
وحب التملك ، عشقهم يعرف الإنتقام ولا يرى العطاء
والتضحية .

اللزي محدثاً نفسه .

..... ثاني مرة ليله تحرق قلبي، مرة لما رفضتني
والمرة دي أصعب ، هربت من سكتي وطريقي
لكن حتروحي فين .

منيرة

.... سمعت الكلام اللي داير في البلد.

اللزي لا يتنبه لحديثها.

.... أخوي ، لزي .

ينتبه لها...

... فيه أيه يامنيره

.... بقولك سمعت الكلام الي بيتقال

في البلد .

.... وهي أم البلد دي ، وراها أيه غير

الكلام .

.... بيقولوا إن حسن هرب سديري وكانوا

مع النسوان الي طلعت الكوله .

.... حسن هج وطفش ، ماتصدقش الكلام

ده ، أهل البلد بيطلعوا الكلام ده غيظ فيه.

..... ومايكنش ليه الكلام صح ، تقدر تقولي

ليله فين ، اكيد هو الي هربها وكمان جتة

سديري فين؟

والحمداني وإبنة فين؟ ، فوق ياخويه

الحاجات دي وراها حد ، وماحدش يقدر

يعمل كده غير واحد زي حسن .

.... الكلام ده كبير، وإزاي واحد لوحده

يعمل كده ، ولو موجود حسن ، هو فين؟

.... أكيد حد من أهل البلد بيساعده .

طرق على الباب ، تفتح منيرة ويدخل هارون.

.....تعالى شوف ياهارون منيره بتتمقلذ عليه.

.... معاها حق .

....أيوه ماأنت فرحان فيه.

... يعني أنت معاها ومع جعفر في اللي بيقلوه

.....أيوه معاهم.

... يعني حسن ورا كل اللي بيحصل.؟

.... أيوه وفيه حد بيساعده في البلد، انت

تعرف سديري كان مختفي فين .

كان مستخبي في بيت واحد

مايخطرش لينا على بال ،

.... ومين اللي يقدر يعمل العملة السوده دي

بدأ هارون في توعية اللزي ويخبره أن أجد الرجال

شاهد إمراة غريبة تدخل دار الشيخ آدم ، وبعد قليل

من الوقت أصبحا اثنين وأنهم من المؤكد أنهم حسن وسديري

غضب اللزي من كلام هارون وتوعد الشيخ ادم

وخرج للبحث عنه.

٤١- السوق .

المصلحة قتلت العدالة وأعدمت الضمير وسجنت الدين

وأسرت العقل وحطمت مدن الحكمة.

الجميع يشرب من نهر الجنون وبحار العقل جفت مياهها.

نسير في طريق اللاعودة ونتحسس ممرات إبليس

وطن الجوعالغنى لا يشبع والفقير لا يجد قوت يومه.

وجد اللزي الشيخ أدم واقفاً عند بائع اللحم عبدالمجتلي

دخل وهو ينهره بشدة

.... أياه الي عملته ياأعمى..؟

.... مَنْ ينطحُ هكذا ؟

.... انا بنطح ياأعمى .

.... أنا أعمى النظر بصحيح ولكن أنت

أعمى البصر والبصيره .

اللزي أمر رجاله بحبسه في الحجرة الملحقة بالزريبة

٤٢- في المقابر

صلبوا الحرية على أبواب القرية حتى يتخطف أهلها
الرعب ، على ناصية الخوف يتقرب الحمداني القطار
المجهول ، يدركون أن الثعلب إخترق حظيرة الدجاج
وتركوا له حرية إختيار الفريسة .

.... شايف القبور اللي حوالينا دي يا حمدان.

.... أيوه يابا .

.... تقدر تعرف القبر ده ولا ده بتاع مين .

..... لا يابا.

... علشان دي عدالة ربنا يابني ، ويمكن

بكره ولا بعده يحطوا عليها أسماء، لكن

تظل أسماء على قبر بطاقته ميت

... لكن تحت الأرض الكل واحد.

... بتقولي ليه كده يابا .

.... علشان أفهمك الفرق بين عدالة ربنا

وعدالة البشر اللي ضايعه .

يواصلان السير ، يتجاوزون القبور.

....إحنا نلف من ورا الكوله يابا

عشان محدش يشوفنا .

.... زي ماتحب يابني.

تجاوزا التبة المرتفعة وبدأوا الصعود للدخول في

الدرب وهو ممر بين جبلين .

بدأ الإعياء على الحمداني .

.... تعبت يا ابني .

... هانت يا با .

سديري يقوم بالحراسة خارج المغارة مع حسن

يحاول أن يجعل حسن يستريح ويكمل هو الحراسة

ولكن دون جدوى وحسن هو من طلب منه الدخول

للمغارة للنوم وأنه سوف يسهر بمفرده .

ظلام دامس وحسن يسمع صوت .

..... أدينا قربنا من المغارة .

تسلل حسن بهدوء لمراقبة مصدر الصوت ، خشية أن

يكون هناك فخ من اللزي ورجاله أو تكون هلوسة منه .

صوت حمدان

.... على مهلك وبشويش ، أدينا وصلنا يا با .

حسن أدرك أن الصوت حقيقي وليس هلوسة .

حسن يحاول أن يتبين مصدر الصوت فوجد شبحين

يتحركان .

..... على مهلك وبشويش خلاص وصلنا .

حسن تأكد من وجود رجلين وقرر قطع الطريق عليهم

.... إنتوا مين ورايحين فين ؟

.... إحنا من البلد يا ابني .

.... من رجال اللزي .

لم يتبينوا ملامحه ولا هو يتبين ملامحهم .

.... لزي مين ياابني ، أنت اللي من رجال اللزي.

.... لا ياسيدي ولا أعرف خلقتهم.

... يعني أنت مش منهم .

.... انتوا اللي مين .

.... أنا الحمداني ومعاه إبنني حمدان .

.... أنت ابو ليله .

.... تبقى أنت أكيد حسن .

... نعم يا عمي تعالي .

.... ليله بخير ياابني .

... ليله بخير وسديري بخير.

كانت فرحة الحمداني عارمة وهو يحتضن ليله وسديري

وشكر حسن حتى أنه كاد أن يقبل يديه، لولا تواضع حسن

ورفضه تقبيل يده .

٤٣- مضيقة جعفر

جعفر استنكر حبس الشيخ آدم من اللزي وعنفه
بشده وطلب منه إطلاق صراحه واضطر اللزي تحت
ضغط جعفر أن يطلق صراحه ويرى أن موقف الشيخ
أدم طبيعي في إستقبال سديري في داره وعلاجه
وطلب من اللزي أن يهتم بما هو أكبر من الشيخ آدم
طلب من هارون إطلاق صراحه وإحضاره إليه ، فأحضر
هارون الشيخ آدم في حضرة جعفر.

.... معلنش يامولانا، أنا معرفتش أنك محبوس

غير دلوقت .

الشيخ آدم ساخراً

.... لا والله! .

... أيوه حتى اسأل هارون جنبك.

....ونعمه الشاهد ، تريد أن أسمع

شهادة لص المعيز.

جعفر يضحك

.... أنت كمان عارف الحكايه دي.

.... ماهو سرق مني صخل (ابن الماعز الصغير)

لسه كان مولود .

جعفر

.... لا ملوش حق .

هارون

... الكلام ده كان زمان ياييه .
الذي شامتاً في هارون.
... شوفت أصل هارون ياييه ؟
الشيخ ادم للذي
... وأنت امك كانت غازية ، تطوق
البلاد وتلاعب بجسدها العيون .
الذي هم بالهجوم على الشيخ آدم لولا أن جعفر نهره.
..... مكانك يالذي .
.... مش شايف بيقول ايه ؟
الشيخ آدم
... وأبيك سارق للبهائم وناقب للبيوت
وييكروه للقتل .
الذي غاضباً
.... الراحل ده لو ماسكتش حقتله.
جعفر
.... مش أنت فرحت وشميت في هارون.
علشان تبطل تعيب ع الناس.
الشيخ آدم لجعفر
.... وأنت أمك كانت حليبه تُخرج الدود
من العيون وكانت تجوب بك البلاد
وأنت صغير و أهطل بتلملم كسر العيش
من الأرض .

جعفر غاضباً

.... أنا يا ابن؟ يسبه ويلعنه.

الشيخ آدم

... أي الذي تسبه كان شيخاً جليلاً

وأبيك كان سقا يملأ الماء للبيوت

ادعي للسجق الي خلاكم تتمطعوا علينا.

جعفر بغضب .

... ارموه بره للكلاب .

الشيخ آدم يرفع عصاه

.... لو حد قرب مني حلوش فيه.

... أنا عارف طريقي كويس .

إستطاع حسن أن يجمع أول نواة لعشيرة تقاوم
الظلم ، أحبوه جميعاً وسيدوه عليهم وعاهدوه
على الوقوف خلفه ولن يتخلوا عنه وكان أول قرار
من حسن إستكمال دخلة سديري على ليله
واحتفل الجميع بهم داخل المغارة . وبدأ بعدها
حسن تدريب سديري وجمدان ومرسال على
التحطيب والسيف.

تم بحمد الله

سمير حمايه

فهرس الكتاب

كلمة.....	٢
١- امام قصر جعفر.....	٣
٢- أمام قصر جعفر.....	٥
٣- المغارة.....	٧
٤- داخل دكان علي معبد.....	١٠
٥- في المدافن.....	١٢
٦- أمام دار الحمداني.....	١٤
٧- قصر جعفر.....	١٧
٨- أمام دار سديري.....	١٩
٩- دار ارمنيوس.....	٢٤
١٠- حجرة لواحظ.....	٢٧
١١- داخل دار الحمداني.....	٢٩
١٢- دار الحمداني.....	٣٣
١٣- في الدرب.....	٣٦
١٤- في الجبل.....	٤٧
١٥- امام دار الحمداني.....	٤٩
١٦- في الطريق.....	٥٢
١٧- دار الشيخ آدم.....	٥٣
١٨- دار ارمنيوس.....	٥٦
١٩- البحث عن ليلة.....	٥٩
٢٠- حجرة لواحظ.....	٦٠
٢١- داخل المغارة.....	٦٤
٢٢- منطقة نخيل.....	٦٦
٢٣- في المغاره.....	٦٨
٢٤- دار الشيخ آدم.....	٦٩
٢٥- مضيقة جعفر.....	٧٢

٢٦- حجرة لواحظ	٧٥.....
٢٧- أمام المغارة.....	٧٧.....
٢٨- امرأة الودع.....	٧٩.....
٢٩- داخل المغارة	٨٥.....
٣٠- خارج المغاره.....	٨٧.....
٣١- مضيقة جعفر.....	٩٣.....
٣٢- حجرة لواحظ	٩٧.....
٣٣- مضيقة جعفر.....	١٠٠.....
٣٤- في الدرب	١٠٢.....
٣٥- أمام دار أرمنيوس	١١٢.....
٣٦- في الجبل	١١٤.....
٣٧- بالقرب من المغارة.....	١٢١.....
٣٨- امام قصر جعفر	١٢٢.....
٣٩- في الحقول	١٢٤.....
٤٠- دار اللزي	١٢٨.....
٤١- السوق	١٣١.....
٤٢- في المقابر.....	١٣٢.....
٤٣- مضيقة جعفر.....	١٣٥.....
فهرس الكتاب	١٣٩.....